

大般涅槃經

(三十六卷：第三十四卷至第三十六卷)

北涼天竺三藏曇無讖譯 梵

宋沙門慧嚴慧觀同謝靈運再治



南無本師釋迦牟尼佛

說 明

本繁體校正版《大般涅槃經》(南本)電子書，是根據《乾隆大藏經》大乘涅槃部，第0110部，北涼天竺三藏曇無讖譯梵、宋沙門慧嚴慧觀同謝靈運再治《大般涅槃經》(36卷)影印本校正的。標點符號僅供參考。

為了便於讀誦，本電子書按順序每三卷合為一冊，共十二冊。若每天讀一冊，可十二天讀完。

本電子書是免費結緣品。特此說明。

仁慧草堂

二〇一八年十一月

目 录

起誦儀	- 1 -
香讚	- 1 -
開經偈	- 1 -
大般涅槃經卷第三十四	- 2 -
迦葉菩薩品第二十四之四	- 2 -
大般涅槃經卷第三十五	- 34 -
憍陳如品第二十五之一	- 34 -
大般涅槃經卷第三十六	- 67 -
憍陳如品二十五之二	- 67 -
結誦儀	- 99 -
補闕真言	- 99 -
發願文	- 99 -
迴向偈	- 100 -
迴向偈	- 100 -
三皈依	- 101 -

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

大般涅槃經卷第三十四

北涼天竺三藏曇無讖譯 梵

宋沙門慧嚴慧觀同謝靈運再治

迦葉菩薩品第二十四之四¹

迦葉菩薩白佛言：「世尊！一切眾生皆從煩惱而得果報。言煩惱者，所謂惡也，從惡煩惱所生煩惱亦名為惡。如是煩惱則有二種：一、因；二、果。因惡故果惡，果惡故子惡。如絰婆果，其子苦故，華、果、莖、葉一切皆苦。猶如毒樹，其子毒故，果亦是毒。因亦眾生，果亦眾生；因亦煩惱，果亦煩惱；煩惱因果即是眾生，眾生即是煩惱因果。若從是義，云何如來先喻雪山亦有毒草、微妙藥王？若言煩惱即是眾生，眾生即是煩惱，云何而言眾生身中有妙藥王？」

佛言：「善哉！善哉！善男子，無量眾生咸同此疑，汝今能為啟請求解，我亦能斷。諦聽！諦聽！善思念之，吾²當為汝分別解說。善男子，雪山喻者，即是眾生；言毒草者，即是煩惱；妙

¹ 大正藏：迦葉菩薩品之四；永樂北藏及龍藏：迦葉菩薩品第二十四之四

² 大正藏：今

藥王者，即淨梵行。善男子，若有眾生能修如是清淨梵行，是名身中有妙藥王。」

迦葉菩薩白佛言：「世尊！云何眾生有清淨梵行？」

「善男子，猶如世間從子生果，是果有能與子作因，有不能者。有能作者，是名果子；若不能作，唯得名果，不得名子。一切眾生亦復如是，皆有二種：一者，有煩惱果，是煩惱因；二者，有煩惱果，非煩惱因。是煩惱果非煩惱因，是則名為清淨梵行。

「善男子，眾生觀受，知是一切漏之近因，所謂內、外漏。受因緣故，不能斷絕一切諸漏，亦不能出三界牢獄。眾生因受，著我、我所，生於心倒、想倒、見倒，是故眾生先當觀受。如是受者為一切愛而作近因，是故智者欲斷愛者，當先觀受。

「善男子，一切眾生十二因緣所作善惡皆因受時，是故我為阿難說言：『阿難，一切眾生所作善惡皆是受時。』是故智者先當觀受。既觀受已，復當更觀如是受者何因緣生？若因緣生，如是因緣復從何生？若無因生，無因何故不生無受？復觀是受，不因自在天生、不因士夫生、不因微

塵生、非時節生、不因想生、不因性生、不從自生、不從他生、非自他生、非無因生，是受皆從緣合而生。因緣者，即是愛也。是和合中，非有受非無受。是故我當斷是和合，斷和合故則不生受。

「善男子，智者³觀因已，次觀果報。眾生因受，受於地獄、餓鬼、畜生乃至三界無量苦惱。受因緣故，受無常樂；受因緣故，斷於善根；受因緣故，獲得解脫。作是觀時，不作受因。云何名為不作受因？謂分別受，何等受能作愛因？何等愛能作受因？善男子，眾生若能如是深觀愛因、受因，則便能斷我及我所。

「善男子，若人能作如是等觀，則應分別愛之與受在何處滅，即見愛、受有少滅處，當知亦應有畢竟滅，爾時即於解脫生信心⁴；生信心已，是解脫處何由而得？知從八正，即便修習。

「云何名為八正道耶？是道觀受有三種相：一者，苦；二者，樂；三者，不苦不樂。如是三種俱能增長身之與心。何因緣故能增長耶？觸因緣也。是觸三種：一者，無明觸；二者，明觸；

³ 大正藏：智者既；永樂北藏及龍藏：智者

⁴ 大正藏：生信；永樂北藏及龍藏：生信心

三者，非明無明觸。言明觸者，即八正道；其餘二觸增長身、心及三種受。是故我應斷二種觸因緣，觸斷不生三受。

「善男子，如是受者，亦名為因，亦名為果，智者當觀亦因亦果。云何為因？因受生愛，名之為因。云何名果？因觸生故，名之為果。是故此受亦因亦果。

「智者如是觀是受已，次復觀愛。受果報故，名之為愛。智者觀愛復有二種：一者，雜食；二者，無食。雜食愛者，因生、老、病、死一切諸有；無食愛者，斷生、老、病、死一切諸有，貪無漏道。智者復當作如是念：『我若生是雜食之愛，則不能斷生、老、病、死。我今雖貪無漏之道，不斷受因則不能得無漏道果。是故應當先斷是觸；觸既斷已，受則自滅；受既滅已，愛亦隨滅。』是名八正道。

「善男子，若有眾生能如是觀，雖有毒身，其中亦有微妙藥王，如雪山中雖有毒草，亦有妙藥。善男子，如是眾生雖從煩惱而得果報，而是果報更不復為煩惱作因，是則⁵名為清淨梵行。

「復次，善男子，智者當觀受、愛二事何因

⁵ 大正藏：即

緣生？知因想生。何以故？眾生見色亦不生貪，及觀受時亦不生貪。若於色中生顛倒想，謂色即是常、樂、我、淨，受是常恒無有變易，因是倒想生貪、恚、癡。是故智者應當觀想。云何觀想？當作是念：『一切眾生未得正道皆有倒想。』云何倒想？於非常中生於常想，於非樂中生於樂想，於非淨中生於淨想，於空法中生於我想，於非男女、大小、晝夜、歲月、衣服、房舍、卧具生於男女至⁶卧具想。是想三種：一者，小；二者，大；三者，無量⁷。小因緣故，生於小想；大因緣故，生於大想；無量緣故，生無量想。復有小想，謂未入定；復有大想，謂已入定；復有無量想，謂十一切入。復有小想，所謂欲界一切想等；復有大想，所謂色界一切想等；復有無量想，謂無色界一切想等。三想滅故，受則自滅；想、受滅故，名為解脫。」

迦葉菩薩言：「世尊！滅一切法名為解脫，如來云何說想、受滅名解脫耶？」

佛言：「善男子，如來或時因眾生說，聞者解法；或時因法說於眾生，聞者亦解說於眾生。」

⁶ 大正藏：乃至；永樂北藏及龍藏：至

⁷ 大正藏：邊

云何名為因眾生說，聞者解法？如我先為大迦葉說：『迦葉，眾生滅時，善法則滅。』是名因眾生說，聞者解法。云何因法說於眾生，聞者亦解說於眾生？如我先為阿難說言：『我亦不說親近一切法，亦復不說不親近一切法。若法近已，善法衰羸，不善熾盛，如是法者不應親近；若法近已，不善衰滅，善法增長，如是法者是應親近。』是名因法說於眾生，聞者亦解說於眾生。

「善男子，如來雖說想、受二滅，則已總說一切可斷。智者既觀如是想已，次觀想因，是無量想因何而生？知因觸生，是觸二種：一者，因煩惱觸；二者，因解脫觸。因無明生，名煩惱觸；因明生者，名解脫觸。因煩惱觸生於倒想，因解脫觸生不倒想。觀想因已，次觀果報。」

迦葉菩薩白佛言：「世尊！若以因此煩惱之想生於倒想，一切聖人實有倒想而無煩惱。是義云何？」

佛言：「善男子，云何聖人而有倒想？」

迦葉菩薩言：「世尊！一切聖人牛作牛想，亦說是牛；馬作馬想，亦說是馬；男女、大小、舍宅、車乘、去來亦爾，是名倒想。」

「善男子，一切凡夫有二種想：一者，世流

布想；二者，著想。一切聖人唯有世流布想，無有著想。一切凡夫惡覺觀故，於世流布生於著想；一切聖人善覺觀故，於世流布不生著想。是故凡夫名為倒想；聖人雖知，不名倒想。

「智者如是觀想因已，次觀果報：『是惡想果在於地獄、餓鬼、畜生、人、天中受。如我因斷惡覺觀故，無明觸斷，是故想斷；因想斷故，果報亦斷。』智者為斷如是想因，修八正道。

「善男子，若有能作如是等觀，則得名為清淨梵行。善男子，是名眾生毒身之中有妙藥王，如雪山中雖有毒草，亦有妙藥。

「復次，善男子，智者觀欲，欲者即是色、聲、香、味、觸。善男子，即是如來因中說果。從此五事生於欲耳，實非欲也。善男子，愚癡之人貪求受之，於是色中生顛倒想，乃至觸中亦生倒想，倒想因緣便生於受，是故世間說因倒想生十種想。欲因緣故，在於世間受惡果報，以惡加於父母、沙門、婆羅門等，所不應作而故作之，不惜身命。是故智者觀是惡想因緣故生欲心，智者如是觀欲因已，次觀果報，是欲多有諸惡果報，所謂地獄、餓鬼、畜生、人中、天上，是名觀果報。若是惡想得除滅者，終不生於此欲心也。無

欲心故，不受惡受；無惡受故，則無惡果。是故我應先斷惡想，斷惡想已，如是等法自然而滅。是故智者為滅惡想修八正道，是則名為清淨梵行。是名眾生毒身之中有妙藥王，如雪山中雖有毒草，亦有妙藥。

「復次，善男子，智者如是觀是欲已，次當觀業。何以故？有智之人當作是念：『受、想、觸、欲即是煩惱。』煩惱者⁸，能作生業、不作受業。如是煩惱與業共行則有二種：一、作生業；二、作受業。是故智者當觀於業，是業三種，謂身、口、意。善男子，身、口二業，亦名為業，亦名業果；意唯名業，不名為果，以業因故則名為業。善男子，身、口二業名為外業，意業名內。是三種業共煩惱行，故作二種業：一者，生業；二者，受業。善男子，正業者，即意業也；期業者，謂身、口業。先發故名意業，從意業生名身、口業，是故意業是⁹名為正。智者觀業已，次觀業因。業因者，即無明觸；因無明觸，眾生求有；求有因緣即是愛也；愛因緣故，造作三種身、口、意業。善男子，智者如是觀業因已，次觀果報。

⁸ 大正藏：是煩惱者；永樂北藏及龍藏：煩惱者

⁹ 大正藏：得

果報有四：一者，黑黑果報；二者，白白果報；三者，雜雜果報；四者，不黑不白不黑不白果報。黑黑果報者，作業時垢，果報亦垢；白白果報者，作業時淨，果報亦淨；雜雜果報者，作業時雜，果報亦雜；不白不黑不白不黑果報者，名無漏業。」

迦葉菩薩白佛言：「世尊！先說無漏無有果報，今云何言不白不黑果報耶？」

佛言：「善男子，是義有二：一者，亦果亦報；二者，唯果非報。黑黑果報，亦名為果，亦名為報。黑因生故，得名為果；能作因故，復名為報。淨、雜亦爾。無漏果者，因有漏生，故名為果；不作他因，不名為報。是故名果，不名為報。」

迦葉菩薩白佛言：「世尊！是無漏業非是黑法，何因緣故不名為白？」

「善男子，無有報故，不名為白；對治黑故，故名為白。我今乃說受果報者名為黑¹⁰白。是無漏業不受報故，不名為白，名為寂靜。如是業者有定受報處，如十惡法定在地獄、餓鬼、畜生，十善之業定在人、天。十不善法有上、中、下，上因緣故，受地獄身；中因緣故，受畜生身；下

¹⁰ 大正藏：之為；永樂北藏及龍藏：為黑

因緣故，受餓鬼身。人業十善復有四種：一者，下；二者，中；三者，上；四者，上上。下因緣故，生鬱單越；中因緣故，生弗婆提；上因緣故，生瞿陀尼；上上因緣生閻浮提。有智之人作是觀已，即作是念：『我當云何斷是果報？』復作是念：『是業因緣無明、觸生，我若斷除無明與觸，如是業果則滅不生。』是故智者為斷無明、觸因緣故，修八正道，是則名為清淨梵行。善男子，是名眾生毒身之中有妙藥王，如雪山中雖有毒草，亦有妙藥。

「復次，善男子，智者觀業、觀煩惱已，次觀是二所得果報，是二果報即是苦也，既知是苦則能捨離一切受生。智者復觀煩惱因緣生於煩惱，業因緣故亦生煩惱，煩惱因緣復生於業，業因緣生苦，苦因緣故生於煩惱，煩惱因緣生有，有因緣生苦，有因緣生有，有因緣生業，業因緣生煩惱，煩惱因緣生苦，苦因緣生苦。善男子，智者若能作如是觀，當知是人能觀業苦。何以故？如上所觀，即是生死十二因緣。若人能觀如是生死十二因緣，當知是人造新業，能壞故業。

「善男子，有智之人觀地獄苦，觀一地獄乃至一百三十六所，一一地獄有種種苦，皆是煩惱、

業因緣生。觀地獄已，次觀餓鬼、畜生等苦。作是觀已，復觀人天所有諸苦，如是眾苦皆從煩惱、業因緣生。善男子，天上雖無大苦惱事，然其身體柔軟細滑，見五相時極受大苦，如地獄苦等無差別。善男子，智者深觀三界諸苦皆從煩惱、業因緣生。

「善男子，譬如坏器則¹¹易破壞，眾生受身亦復如是，既受身已，是眾苦器。譬如大樹，華果繁茂，眾鳥能壞；如多乾草，小火能焚，眾生受身為苦所壞亦復如是。善男子，智者若能觀苦八種如聖行中，當知是人能斷眾苦。

「善男子，智者深觀是八苦已，次觀苦因。苦因者，即愛無明。是愛無明則有二種：一者，求身；二者，求財。求身求財二俱是苦，是故當知，愛無明者即是苦因。善男子，是愛無明則有二種：一者，內；二者，外。內能作業，外能增長；又復內能作業，外作業果。斷內愛已，業則能¹²斷；斷外愛已，果則得斷。內愛能生未來世苦，外愛能生現在世苦。智者觀愛即是苦因，既觀因已，次觀果報。苦果報者，即是取也。愛果

¹¹ 大正藏：即

¹² 大正藏：得

名取，是取因緣即內、外愛，則有愛苦。善男子，智者當觀：『愛因緣取，取因緣愛。若我能斷愛、取二事，則不造業，受於眾苦。』是故智者為斷愛¹³苦修八正道。善男子，若有人能如是觀者，是則名為清淨梵行。是名眾生毒身之中有妙藥王，如雪山中雖有毒草，亦有妙藥。」

迦葉菩薩白佛言：「世尊！云何名為清淨梵行？」

佛言：「善男子，一切法是。」

迦葉菩薩言：「世尊！一切法者，義不決定。何以故？如來或說是善、不善，或時說為四念處觀，或說是十二入，或說是善知識，或說是十二因緣，或說是眾生，或說是正見、邪見，或說十二部經，或說即是二諦，如來今乃說一切法為淨梵行，悉是何等一切法耶？」

佛言：「善哉！善哉！善男子，如是微妙大涅槃經，乃是一切法之¹⁴寶藏。

「譬如大海，是眾寶藏；是涅槃經亦復如是，即是一切字義祕藏。

「善男子，如須彌山，眾藥根本；是經亦爾，

¹³ 大正藏：受

¹⁴ 大正藏：善法；永樂北藏及龍藏：法之

即是菩薩戒之根本。

「善男子，譬如虛空，是一切物之所住處；是經亦爾，即是一切善法住處。

「善男子，譬如猛風，無能繫縛；一切菩薩行是經者，亦復如是，不為一切煩惱惡法之所繫縛。

「善男子，譬如金剛，無能壞者；是經亦爾，雖有外道惡邪之人，不能破壞。

「善男子，如恒河沙，無能數者；如是經義亦復如是，無能數者。

「善男子，是經典者，為諸菩薩而作法幢，如帝釋幢。

「善男子，是經即是趣涅槃城之商主也，如大導師引諸商人趣向大海。

「善男子，是經能為諸菩薩等作法光明，如世日月能破諸闇。

「善男子，是經能為病苦眾生作大良藥，如香山中微妙藥王能治眾病。

「善男子，是經能為一闡提杖，猶如羸人因之得起。

「善男子，是經能為一切惡人而作橋梁，猶如世橋能渡一切。

「善男子，是經能為行二十五¹⁵有者遇煩惱熱而作陰涼，如世間蓋遮覆暑熱。

「善男子，是經即是大無畏王，能壞一切煩惱惡魔，如師子王降伏眾獸。

「善男子，是經即是大神呪師，能壞一切煩惱惡¹⁶鬼，如世呪師能去魍魎。

「善男子，是經即是無上霜雹，能壞一切生死果報，如世雹雨壞諸果實。

「善男子，是經能為壞戒目者作大良藥，猶如世間安闍陀藥善療眼痛。

「善男子，是經能住一切善法，如世間地能住眾物。

「善男子，是經即是毀戒眾生之明鏡也，如世間鏡見諸色像。

「善男子，是經能為無慚愧者而作衣服，如世衣裳障蔽形體。

「善男子，是經能為貧善法者作大財寶，如功德天利益貧者。

「善男子，是經能為渴法眾生作甘露漿，如八味水充足渴者。

¹⁵ 大正藏：三；永樂北藏及龍藏：二十五

¹⁶ 大正藏：魔

「善男子，是經能為煩惱之人而作法床，如世之¹⁷人遇安隱床。

「善男子，是經能為初地菩薩至十住¹⁸菩薩而作瓔珞、香華、塗香、末香、燒香，清淨種性，具足之乘過於一切六波羅蜜受妙樂處，如忉利天波利質多羅樹。

「善男子，是經即是金剛利斧，能伐一切煩惱大樹；即是利刀，能割習氣；即是勇健，能摧魔怨；即是智火，焚煩惱薪；即因緣藏，出辟支佛；即是聲聞藏¹⁹，生聲聞人。即是一切諸天之眼，即是一切人之正道，即是一切畜生依處，即是餓鬼解脫之處，即是地獄無上之尊，即是一切十方眾生無上之器，即是十方過去、未來、現在諸佛之父母也。善男子，是故此經攝一切法。如我先說，此經雖攝一切諸法，我說梵行即是三十七助道之²⁰法。善男子，若離如是三十七品，終不能得聲聞正果乃至阿耨多羅三藐三菩提果，不見佛性及佛性果。以是因緣，梵行即是三十七品。何以故？三十七品，性非顛倒，能壞顛倒；性非惡見，能壞惡見；性非怖畏，能壞怖畏；性是淨

¹⁷ 大正藏：乏

¹⁸ 大正藏：地

¹⁹ 大正藏：聲聞藏；永樂北藏及龍藏：聞藏；校勘：聲聞藏

²⁰ 大正藏：道；永樂北藏及龍藏：道之

行，能令眾生畢竟造作清淨梵行。」

迦葉菩薩白佛言：「世尊！有漏之法亦復能作無漏法因，如來何故不說有漏為淨梵行？」

「善男子，一切有漏即是顛倒，是故有漏不得名為清淨梵行。」

迦葉菩薩白佛言：「世尊！世第一法為是有漏？為是²¹無漏耶？」

佛言：「善男子，是有漏也。」

「世尊！雖是有漏，性非顛倒。何故不名清淨梵行？」

「善男子，世第一法，無漏因故，似於無漏；向無漏故，不名顛倒。善男子，清淨梵行發心相續乃至畢竟，世第一法唯是一心²²，是故不得名淨梵行。」

迦葉菩薩白佛言：「世尊！眾生五識亦是有漏，非是顛倒，復非一心²³，何故不名清淨梵行？」

「善男子，眾生五識雖非一念，然是有漏，復是顛倒，增諸漏故名為有漏；體非真實，著想故倒。云何名為體非真實，著想故倒？非男女中生男女想；乃至舍宅、車乘、瓶、衣亦復如是，

²¹ 大正藏：是；永樂北藏及龍藏：為是

²² 大正藏：念

²³ 大正藏：念

是名顛倒。善男子，三十七品性無顛倒，是故得名清淨梵行。善男子，若有菩薩於三十七品知根、知因、知攝、知增、知主、知導、知勝、知實、知畢竟者，如是菩薩則得名為清淨梵行。」

迦葉菩薩白佛言：「世尊！云何名為知根乃至知畢竟耶？」

佛言：「善男子，善哉！善哉！菩薩發問為於二事：一者，為自知故；二者，為他知故。汝今已知，但為無量眾生未解啟請是事，是故我今重讚歎汝。善哉！善哉！」

「善男子，三十七品根本是欲，因名明觸，攝取名受，增名善思，主名為念，導名為定，勝名智慧，實名解脫，畢竟名為大般涅槃。善男子，善欲即是初發道心，乃至阿耨多羅三藐三菩提之根本也，是故我說欲為根本。善男子，如世間說，一切苦惱，愛為根本；一切疾病，宿食為本；一切斷事，鬪爭為本；一切惡事，虛妄為本。」

迦葉菩薩白佛言：「世尊！如來先於此經中說：『一切善法，不放逸為本。』今乃說欲。是義云何？」

佛言：「善男子，若言生因，善欲是也；若言了因，不放逸是。如世間說，一切果者，子為

其因；或復有說子為生因，地為了因。是義亦爾。」

迦葉菩薩言：「世尊！如來先於餘經中說，三十七品，佛是根本。是義云何？」

「善男子，如來先說，眾生初知三十七品，佛是根本；若自證得，欲為根本。」

「世尊！云何明、觸名之為因？」

「善男子，如來或時說明為慧，或說為信。善男子，信因緣故親近善友，是名為觸；親近因緣得聞正法，是名為觸；因聞正法，身、口、意淨，是名為觸；因三業淨獲得正命，是名為觸。因正命故，得淨根戒；因淨根戒，樂寂靜處；因樂寂靜，能善思惟；因善思惟，得如法住；因如法住，得三十七品，能壞無量諸惡煩惱，是名為觸。」

「善男子，受名攝取，眾生受時能作善惡，是故名受為攝取也。善男子，受因緣故，生諸煩惱，三十七品能破壞之，是故以受為攝取也。」

「因善思惟能破煩惱，是故名增。何以故？勤修習故，得如是等三十七品。」

「若觀能破諸惡煩惱要賴專念，是故以念為主。如世間中，一切四兵隨主將意；三十七品亦

復如是，皆隨念主。既入²⁴定已，三十七品能善分別一切法相，是故以定為導。是三十七品分別法相，智為最勝，是故以慧為勝。如是智慧知煩惱已，智慧力故，煩惱消滅。如世間中，四兵壞怨或一或二，勇健者能；三十七品亦復如是，智慧力故能壞煩惱，是故以慧為勝。善男子，雖因修習三十七品獲得四禪、神通、安樂，亦不名實；若壞煩惱、證解脫時，乃名為實。是三十七品發心修道，雖得世樂及出世樂、四沙門果及以解脫，亦不得名為畢竟也。若能斷除三十七品所行之事，是名涅槃。是故我說畢竟者即大涅槃。

「復次，善男子，善愛念心即是欲也。因善愛念親近善友，故名為觸，是名為因。因近善友，故名為受，是名攝取。因近善友能善思惟，故名為增。因是四法能生長道，所謂欲、念、定、智，是則²⁵名為主導勝也。因是三法得二解脫，除斷愛故得心解脫，斷無明故得慧²⁶解脫，是名為實。如是八法，畢竟得果，名為涅槃，故名畢竟。

「復次，善男子，欲者即是發心出家，觸者即是白四羯磨，是名為因。攝者即是受二種戒：

²⁴ 大正藏：善男子，既入；永樂北藏及龍藏：既入

²⁵ 大正藏：即

²⁶ 大正藏：得慧；永樂北藏及龍藏：慧得；校勘：得慧

一者，波羅提木叉戒；二者，淨根戒。是名為受，是名攝取。增者即是修習四禪，主者即是須陀洹果、斯陀含果，導者即是阿那含果，勝者即²⁷阿羅漢果，實者即是辟支佛果，畢竟者即是阿耨多羅三藐三菩提果。

「復次，善男子，欲名為識，觸名六入，攝名為受，增名無明，主名名色，導名為愛，勝名為取，實名為有，畢竟²⁸名生、老、病、死。」

迦葉菩薩言：「世尊！根本、因、增，如是三法云何有異？」

「善男子，所言根者，即是初發；因者，即是相似不斷；增者，即是滅相似已能生相似。復次，善男子，根即是作，因即是果，增即可用。善男子，未來之世雖有果報，以未受故，名之為因；及其受時，是名為增。復次，善男子，根即是求，得即是因，用即是增。善男子，是經中，根即是見道，因即是²⁹修道，增³⁰即是無學道也。復次，善男子，根即正因，因即方便因，從是二³¹因獲得果報，名為增長。」

²⁷ 大正藏：即是；永樂北藏及龍藏：即

²⁸ 大正藏：畢竟者；永樂北藏及龍藏：畢竟

²⁹ 大正藏：即；永樂北藏及龍藏：即是

³⁰ 大正藏：增者；永樂北藏及龍藏：增

³¹ 大正藏：二；永樂北藏及龍藏：正；校勘：二

迦葉菩薩言：「世尊！如佛所說，畢竟者即是涅槃，如是涅槃云何可得？」

「善男子，若菩薩摩訶薩、若比丘³²、比丘尼、優婆塞、優婆夷能修十想，當知是人能得涅槃。云何為十？一者，無常想；二者，苦想；三者，無我想；四者，厭離食想；五者，一切世間不可樂想；六者，死想；七者，多過罪想；八者，離解脫想³³；九者，滅想；十者，無愛想。善男子，菩薩摩訶薩、比丘、比丘尼、優婆塞、優婆夷修習如是十種想者，是人畢竟定得涅槃，不隨他心，自能分別善、不善等，是名真實稱比丘義乃至得稱優婆夷義。」

迦葉菩薩言：「世尊！云何名為菩薩乃至優婆夷等修無常想？」

「善男子，菩薩二種：一、初發心；二、已行道。無常想者亦復二種：一、麤；二、細。初心菩薩觀無常想時作是思惟：『世間之物凡有二種：一、內；二、外。如是內物無常變異，我見生時、小時、大時、壯時、老時、死時，是諸時節各各不同，是故當知內物無常。』復作是念：

³² 大正藏：比丘；永樂北藏及龍藏：若比丘

³³ 大正藏：離想；永樂北藏及龍藏：離解脫想

『我見眾生或有肥鮮，具足色力，去來、進止自在無閼³⁴；或見病苦，色力毀悴，顏貌羸損，不得自在；或見財富庫藏盈溢；或見貧窮觸事斯乏；或見成就無量功德；或見具足無量惡法。是故定知內法無常。』復觀外法：『子時、芽³⁵時、莖時、葉時、華時、果時，如是諸時各各不同。如是外法或有具足、或不具足，是故當知一切外物定是無常。』既觀見法是無常已，復觀聞法：『我聞諸天具足成就極妙快樂，神通自在，亦有五相。是故當知即是無常。復聞劫初有諸眾生各各具足上妙功德，身光自照，不假日月，無常力故，光滅德損。復聞昔有轉輪聖王統四天下，成就七寶，得大自在，而不能壞無常之相。』復觀大地：『往昔之時，安處布置無量眾生，間無空處如車輪許，具足生長一切妙藥，叢林、樹木、果實滋茂；眾生薄福，今³⁶此大地無復勢力，所生之物遂成虛耗。是故當知，內外之法一切無常。』是則名為麤無常也。

「既觀麤已，次觀細者。云何名細？菩薩摩訶薩觀於一切內外之物乃至微塵，在未來時已是

³⁴ 大正藏：礙

³⁵ 大正藏：牙

³⁶ 大正藏：今

無常。何以故？具足成就破壞相故。若未來色非無常者，不得言色有十時差別。云何為十？一者，膜時；二者，泡時；三者，疱³⁷時；四者，肉團時；五者，肢³⁸時；六者，嬰孩時；七者，童子時；八者，少年時；九者，盛壯時；十者，衰老時。菩薩觀膜：若非無常，不應至泡³⁹；乃至盛壯，非無常者，終不至老。若是諸時非念念滅，終不漸長，應當一時成長具足。無⁴⁰是事故，是故當知定有念念微細無常。復見有人諸根具足，顏色暉暉，復⁴¹見枯悴，復作是念：『是人定有念念無常。』復觀四大及四威儀，復觀內外，各二苦因，飢渴寒熱。復觀是四，若無念念微細無常，亦不得說如是四苦。若有菩薩能作是念，是名菩薩觀細無常。

「如內、外色，心法亦爾。何以故？行六處故。行六處時，或生喜心，或生瞋⁴²心、或生愛心、或生貪⁴³心，展轉異生，不得一種。是故當知，一切色法及非色法悉是無常。

³⁷ 大正藏：胞

³⁸ 大正藏：肢

³⁹ 大正藏：胞

⁴⁰ 大正藏：無；永樂北藏及龍藏：以；校勘：無

⁴¹ 大正藏：後

⁴² 大正藏：瞋；永樂北藏及龍藏：顛；校勘：瞋

⁴³ 大正藏：念

「善男子，菩薩若能於一念中見一切法生滅無常，是名菩薩具無常想。善男子，智者修習無常想已，遠離常慢、常倒、想倒。

「次修苦想。何因緣故有如是苦？深知是苦因於無常，因無常故，受生、老、病、死。生、老、病、死因緣故，名為無常。無常因緣故，受內外苦。飢渴寒熱，鞭打罵辱，如是等苦皆因無常。復次，智者深觀此身即無常器，是器即苦，以器苦故，所受盛法亦復是苦。

「善男子，智者復觀：『生即是苦，滅即是苦，苦生滅故，即是無常，非我、我所，修無我想。』智者復觀：『苦即無常，無常即苦。若苦無常，智者云何說言有我？苦非是我，無常亦爾。如是五陰亦苦、無常，眾生云何說言有我？』復次，觀一切法有異和合，不從一和合生一切法，亦非一法是一切和合果。一切和合皆無自性，亦無一性，亦無異性，亦無物性，亦無自在。諸法若有如是等相，智者云何說言有我？復作是念：『一切法中，無有一法能為作者。若使一法不能作者，眾法和合亦不能作。一切諸法性終不能獨生獨滅，和合故滅，和合故生。是法生已，眾生倒想，言是和合，從和合生。眾生想倒，無有真

實，云何而有真實我耶？』是故智者觀於無我。又復諦觀：『何因緣故眾生說我？是我若有，應一？應多？我若一者，云何而有刹利、婆羅門、毗舍、首陀、人、天、地獄、餓鬼、畜生、大、小、老、壯？是故知我非是一也。我若多者，云何說言眾生我者是一、是遍，無有邊際？若一若多，二俱無我。』

「智者如是觀無我已，次復觀於厭離食想，作是念言：『若一切法無常、苦、空、無我⁴⁴，云何為食起身、口、意三種惡業？若有眾生為貪食故起身、口、意三種惡業，所得財物眾皆共之，後受苦果無共分者。』

「善男子，智者復觀：『一切眾生為飲食故身、心受苦，若從眾苦而得食者，我當云何於是食中而生貪著？』是故於食不生貪心。

「復次，智者當觀：『因於飲食，身得增長。我今出家，受戒修道，為欲捨身，今貪此食，云何當得捨此身耶？』如是觀已，雖復受食，猶如曠野食其子肉，其心厭惡，都不甘樂。深觀搏食有如是過，次觀觸食，如被剝牛，為無量虫之所

⁴⁴ 大正藏：空、無我；永樂北藏及龍藏：無我；校勘：空、無我

啖食。次觀思食，如大火聚。識食猶如三百穢⁴⁵矛。

「智者⁴⁶如是觀四食已，於食終不生貪樂想。若猶生貪，當觀不淨。何以故？為離貪⁴⁷愛故。於一切食，善能分別不淨之想，隨諸不淨令與相似。如是觀已，若得好食及以惡食，受時猶如塗癰創⁴⁸藥，終不生於貪愛之心。善男子，智者若能如是觀者，是名成就厭離食想。」

迦葉菩薩言：「世尊！智者觀食作不淨想，為是實觀？虛解觀耶？若是實觀，所觀之食實非不淨；若是虛解，是法云何名為善想？」

佛言：「善男子，如是想⁴⁹者，亦是實觀，亦是虛解。能壞貪食，故名為實；非虫見虫，故名虛解。善男子，一切有漏皆名為虛，亦能得實。

「善男子，若有比丘發心乞食，預作是念：『我當乞食，願得好者，莫得麤惡；願必多得，莫令鮮⁵⁰少；亦願速得，莫令遲晚。』如是比丘不名於食得厭離想，所修善法日夜衰耗，不善之法漸當增長。善男子，若有比丘欲乞食時先當願言：『令諸乞者悉得飽滿，其施食者得無量福。我若

⁴⁵ 大正藏：鑽

⁴⁶ 大正藏：善男子，智者；永樂北藏及龍藏：智者

⁴⁷ 大正藏：食

⁴⁸ 大正藏：瘡

⁴⁹ 大正藏：觀

⁵⁰ 大正藏：鮮

得食，為療毒身，修習善法，利益施主。』作是願時，所修善法日夜增長，不善之法漸當消滅。善男子，若有比丘能如是修，當知是人空食於國中信施。

「善男子，智者具足如是四想，能修世間不可樂想，作是念言：『一切世間無處不有生、老、病、死，而我此身無處不生。若世間中無有一處當得離於生、老、病、死，我當云何樂於世間？一切世間無有進得而不退失，是故世間定是無常。若是無常，云何智人而樂於世？一一眾生，周遍經歷一切世間，具受苦樂，雖復得受梵天之神，乃至非想非非想天，命終還墮三惡道中。雖為四王，乃至他化自在天身，命終生於畜生道中，或為師子、虎、兕、豺、狼、象、馬、牛、驢。』次觀轉輪聖王⁵¹，統四天下，豪貴自在，福盡貧困，衣食不供。智者深觀如是事已，生於世間不可樂想。

「智者復觀：『世間有法，所謂舍宅、衣服、飲食、卧具、醫藥、香華、瓔珞、種種妓樂、財物、寶貨，如是等事皆為離苦。如⁵²是等物，體

⁵¹ 大正藏：轉輪聖王之身；永樂北藏及龍藏：轉輪聖王

⁵² 大正藏：而

即是苦，云何以苦欲離於苦？』善男子，智者如是觀已，於世間物不生愛樂而作樂想。

「善男子，譬如有人，身嬰重病，雖有種種音樂、倡妓、華香⁵³、瓔珞，終不於中生貪愛樂；智者觀已，亦復如是。

「善男子，智者深觀：『一切世間非歸依處、非解脫處、非寂靜處、非可愛處、非彼岸處、非是常樂我淨之法，若我貪樂如是世間，我當云何得離是法？如人不樂處闇而求光明，還復歸闇，闇即世間，明即出世。若我樂世，增長黑闇，遠離光明，闇即無明，光即智明，是智明因即是世間不可樂想。一切貪結雖是繫縛，然我今者貪於智明，不貪世間。』智者深觀如是法已，具足世間不可樂想。

「善男子，有智之人已修世間不可樂想，次修死想。觀是壽命常為無量怨讎所遶，念念損減，無有增長。猶山暴⁵⁴水不得停住，亦如朝露勢不久停，如囚趣市步步近死，如牽牛羊詣於屠所。」

迦葉菩薩言：「世尊！云何智者觀念念滅？」

「善男子，譬如四人，皆善射術，聚在一處，

⁵³ 大正藏：香華

⁵⁴ 大正藏：瀑

各射一方，俱作是念：『我等四箭俱發俱墮。』復有一人作是念言：『如是四箭及其未墮，我能一時以手接取。』善男子，如是之人可說疾不？」

迦葉菩薩言：「如是。世尊！」

佛言：「善男子，地行鬼疾復速是人，有飛行鬼復速地行，四天王疾復速飛行，日月神天復速四王，行堅疾天復速日月，眾生壽命復速堅疾。善男子，一息一眴，眾生壽命四百生滅。智者若能觀命如是，是名能觀念念滅也。」

「善男子，智者觀命繫屬死王：『我若能離如是死王，則得永斷無常壽命。』復次，智者觀是壽命，猶如河岸臨峻大樹、亦如有人作大逆罪及其受戮無憐憫⁵⁵者，如師子王大飢困時，亦如毒蛇吸火⁵⁶風時，猶如渴馬護惜水時，如大惡鬼瞋恚發時，眾生死王亦復如是。善男子，智者若能作如是觀，是則名為修習死想。」

「善男子，智者復觀：『我今出家，設得壽命七日七夜，我當於中精勤修道，護持禁戒，說法教化，利益眾生。』是名智者修於死想。復以七日七夜為多：『若得六日、五日、四日、三日、

⁵⁵ 大正藏：惜

⁵⁶ 大正藏：大

二日、一日、一時、乃至出息入息之頃，我當於中精勤修道，護持禁戒，說法教化，利益眾生。』是名智者善修死想。

「智者具足如上六想，即七想因。何等名七？一者，常修想；二者，樂修想；三者，無瞋想；四者，無妬想；五者，善願想；六者，無慢想；七者，三昧自在想。善男子，若有比丘具是⁵⁷七想，是名沙門、名婆羅門、是名寂靜、是名淨潔、是名解脫、是名智者、是名正見、名到彼岸、名大醫王、是大商主、是名善解如來祕密，亦知諸佛七種之語名正見知，斷七種語中所生疑網。

「善男子，若人具足如上六想，當知是人能呵三界，遠離三界，滅除三界，於三界中不生愛著，是名智者具足十想。若有比丘具足⁵⁸十想，則⁵⁹得稱可沙門之相。」

爾時，迦葉菩薩即於佛前，以偈讚佛：

憐憫世間大醫王 身及智慧俱寂靜
無我法中有真我 是故敬禮無上尊
發心畢竟二不別 如是二心先心難
自未得度先度他 是故我禮初發心

⁵⁷ 大正藏：足

⁵⁸ 大正藏：是

⁵⁹ 大正藏：即

初發心⁶⁰為人天師 勝出聲聞及緣覺
如是發心過三界 是故得名最無上
世救要求然後得 如來無請而為歸⁶¹
佛隨世間如犢子 是故得名大悲牛
如來功德滿十方 凡下無智不能讚
我今讚歎慈悲心 為報身口二種業
世間常樂自利益 如來終不為是事
能斷眾生世果報 是故我禮自他利⁶²
世間逐親作益厚 如來利益無怨親
佛無是想⁶³如世人 是故其心等無二
世間說異作業異 如來如說業無差
凡所修行斷諸行 是故得名為如來
先已了知煩惱過 示現處之為眾生
久於世間得解脫 樂處生死慈悲故
雖現天身及人身 慈悲隨逐如犢子
如來即是眾生母 慈心即是小犢子
自身受⁶⁴苦念眾生 憫悲念時心不悔
憐憫心盛不覺苦 故我稽首拔苦者
如來雖作無量福 身口意業恒清淨

⁶⁰ 大正藏：已

⁶¹ 大正藏：師

⁶² 大正藏：和

⁶³ 大正藏：相

⁶⁴ 大正藏：受眾；永樂北藏及龍藏：身受

常為眾生不為己 是故我禮清淨業
如來受苦不覺苦 見眾受⁶⁵苦如己苦
雖為眾生處地獄 不生苦想及悔心
一切眾生受異苦 悉是如來一人苦
覺已其心轉堅固 故能勤修無上道
佛具一味大慈心 憫念眾生如子想
眾生不知佛能救 故謗如來及法僧
世間雖具眾煩惱 亦有無量諸過惡
如是眾結及罪過 佛初發心已能壞
唯有諸佛能讚佛 除佛無能讚歎者
我今唯以一法讚 所謂慈心遊世間
如來慈是⁶⁶大法聚 是慈亦能度眾生
即是無上真解脫 解脫即是涅槃

大般涅槃經卷第三十四

⁶⁵ 大正藏：生

⁶⁶ 大正藏：是慈

大般涅槃經卷第三十五

北涼天竺三藏曇無讖譯 梵

宋沙門慧嚴慧觀同謝靈運再治

憍陳如品第二十五之一

爾時，世尊告憍陳如：「色是無常，因滅是色，獲得解脫常住之色，受、想、行、識亦是無常，因滅是識，獲得解脫常住之識。

「憍陳如，色即是苦，因滅是色，獲得解脫安樂之色，受、想、行、識亦復如是。

「憍陳如，色即是空，因滅空色，獲得解脫非空之色，受、想、行、識亦復如是。

「憍陳如，色是無我，因滅是色，獲得解脫真我之色，受、想、行、識亦復如是。

「憍陳如，色是不淨，因滅是色，獲得解脫清淨之色，受、想、行、識亦復如是。

「憍陳如，色是生、老、病、死之相，因滅是色，獲得解脫非生、老、病、死相之色，受、想、行、識亦復如是。

「憍陳如，色是無明因，因滅是色，獲得解脫非無明因色，受、想、行、識亦復如是。

「憍陳如，乃至色是生因，因滅是色，獲得解脫非生因色，受、想、行、識亦復如是。

「憍陳如，色者即是四顛倒因，因滅顛倒⁶⁷色，獲得解脫非四倒因色，受、想、行、識亦復如是。

「憍陳如，色是無量惡法之因，所謂男女⁶⁸等身、食愛、欲愛、貪瞋、嫉妬、惡心、慳心、搏食、識食、思食、觸食、卵生、胎生、濕生、化生、五欲、五蓋，如是等法皆因於色，因滅色故，獲得解脫無如是等無量惡色，受、想、行、識亦復如是。

「憍陳如，色即是縛，因滅縛色，獲得解脫無縛之色，受、想、行、識亦復如是。

「憍陳如，色即是流，因滅流色，獲得解脫非流之色，受、想、行、識亦復如是。

「憍陳如，色非歸依，因滅是色，獲得解脫歸依之色，受、想、行、識亦復如是。

「憍陳如，色是瘡疣，因滅是色，獲得解脫無瘡疣色，受、想、行、識亦復如是。

「憍陳如，色非寂靜，因滅是色獲得涅槃寂靜之色，受、想、行、識亦復如是。

⁶⁷ 大正藏：倒；永樂北藏及龍藏：顛倒

⁶⁸ 大正藏：女；永樂北藏及龍藏：子；校勘：女

「憍陳如，若有人能如是知者，是名沙門，名婆羅門，具足沙門、婆羅門法。

「憍陳如，若離佛法，無有沙門及⁶⁹婆羅門，亦無沙門、婆羅門法。一切外道虛假詐稱，都無實行，雖復作相，言有是二，實無是處。何以故？若無沙門、婆羅門法，云何而言有沙門、婆羅門？我常於此大眾之中作師子吼，汝等亦當在大眾中作師子吼。」

爾時，外道有無量人聞是語已，心生瞋惡：「瞿曇今說我等眾中，無有沙門及婆羅門，亦無沙門、婆羅門法。我當云何廣設方便語瞿曇言『我等眾中亦有沙門、有沙門法，有婆羅門、有婆羅門法』？」

時彼眾中，有一梵志唱如是言：「諸仁者，瞿曇之言如狂無異，何可檢校？世間狂人或歌、或舞、或哭、或笑、或罵、或讚，於怨親所不能分別。沙門瞿曇亦復如是，或說我生淨飯王家，或言不生；或說生已行至七步，或說不行；或說從小習學世事，或說我是一切智人；或時處宮受樂生子，或時厭患、呵責、惡賤；或時親修苦行六年，或時呵責外道苦行；或言從彼鬱頭藍弗、

⁶⁹ 大正藏：無

阿羅羅⁷⁰等稟承未聞，或時說其無所知曉；或時說言菩提樹下得阿耨多羅三藐三菩提，或時說言我不至樹無所剋獲；或時說言我今此身即是涅槃，或言身滅乃是涅槃。瞿曇所說如狂無異，何故以此而愁憤耶？」

諸婆羅門即便答言：「大士，我等今者何得不愁？沙門瞿曇先出家已，說無常、苦、空、無我、不淨，我諸弟子聞生恐怖：『云何眾生無常、苦、空、無我、不淨？』不受其語。今者，瞿曇復來至此娑羅林中，為諸大眾說有常、樂、我、淨之法。我諸弟子聞是語已，悉捨我去，受瞿曇語。以是因緣，生大愁苦。」

爾時，復有一婆羅門作如是言：「諸仁者，諦聽！諦聽！瞿曇沙門名修慈悲，是言虛妄，非真實也。若有慈悲，云何教我諸弟子等自受其法？慈悲果者，隨順他意，今違我願，云何言有？若有說言沙門瞿曇不為世間八法所染，是亦虛妄。若言瞿曇少欲知足，今者云何奪我等利？若言種姓是上族者，是亦虛妄。何以故？從昔已來不見不聞大師子王殘害小鼠。若使瞿曇是上種姓，如何今者惱亂我等？若言瞿曇具大勢力，是亦虛妄。」

⁷⁰ 大正藏：邏

何以故？從昔已來亦不見聞金翅鳥王與鳥共爭。若言力大，復以何事與我共鬪？若言瞿曇具他心智，是亦虛妄。何以故？若具此智，以何因緣不知我心？諸仁者，我昔曾從先舊智人聞說是事：『過百年已，世間當有一妖幻出。』即是瞿曇。如是妖惑，今於此處娑羅林中，將滅不久，汝等今者，不應愁惱。」

爾時，復有一尼捷子言⁷¹：「仁者，我今愁苦，不為自身弟子供養，但為世間癡闇無眼，不識福田及非福田，棄捨先舊智婆羅門，供養年少，以為愁耳。瞿曇沙門大知呪術，因呪術力能令一身作無量身，令無量身還作一身，或以自身作男女像、牛、羊、象、馬。我力能滅如是呪術，瞿曇沙門呪術既滅，汝等當還多得供養，受於安樂。」

爾時，復有一婆羅門作如是言：「諸仁者，瞿曇沙門成就具足無量功德，是故汝等不應與爭。」

大眾答言：「癡人！云何說言沙門瞿曇具大功德？其生七日，母便命終，是可得名福德相耶？」

婆羅門言：「罵時不瞋，打時不報，當知即

⁷¹ 大正藏：尼捷子答言；永樂北藏及龍藏：尼捷子言

是大福德相。其身具足三十二相、八十種好、無量神通，是故當知是福德相。心無憍慢，先意問訊，言語柔軟，初無麤獷，年志俱盛，心不卒暴。王國多財無所愛戀，捨之出家如棄洩⁷²唾。是故我說沙門瞿曇成就具足無量功德。」

大眾答言：「善哉！仁者，瞿曇沙門實如所說，成就無量神通變化，我不與彼角⁷³試是事。瞿曇沙門受性柔軟，不堪苦行，生長深宮，不綜外事，唯可軟語，不知技⁷⁴藝、書籍、論議，請共詳辯正法之要，彼若勝我，我當給事；我若勝彼，彼當事我。」

爾時，多有無量外道和合共往摩伽陀王阿闍世所。王見便問：「諸仁者，汝等各各修習聖道，是出家人，捨離財貨及在家事，我國人民皆共供養，敬心瞻視，無相犯觸，何故和合而來至此？諸仁者，汝等各受異法、異戒，出家不同，亦復各各自隨戒法出家修道，何因緣故今者一心而共和合，猶如葉落，旋風所吹，聚在一處？說何因緣而來至此？我常擁護出家之人，乃至不惜身之與命。」

⁷² 大正藏：涕

⁷³ 大正藏：掬

⁷⁴ 大正藏：伎

爾時，一切諸外道眾咸作是言：「大王諦聽！大王今者，是大法橋，是大法礪，是大法稱⁷⁵；即是一切功德之器，一切功德真實之性，正法道路；即是種子之良田也，一切國土之根本也，一切國土之明鏡也，一切諸天之形像也，一切國人之父母也。大王！一切世間功德寶藏即是王身。何以故名功德藏？王斷國事不擇親怨⁷⁶，其心平等如地、水、火、風，是故名王為功德藏。大王！現在眾生雖復壽短，王之功德如昔長壽安樂時，王亦如頂生、善見、忍辱、那睺沙王、耶邪⁷⁷諦王、尸毗王、一叉鳩王，如是等王具足善法，大王今者亦復如是。大王！以王因緣，國土安樂，人民熾盛，是故一切出家之人慕樂此國，持戒精勤，修習正道。大王！我經中說：『若出家人，隨所住國，持戒精勤⁷⁸，修習⁷⁹正道，其王亦有修善之分。』大王！一切盜賊，王已整理，出家之人都無畏懼。今者唯有一大惡人瞿曇沙門，王未檢校，我等甚畏。其人自恃豪族種姓，身色具足，又因過去布施之報多得供養，恃此眾事生大憍慢，

⁷⁵ 大正藏：秤

⁷⁶ 大正藏：怨親

⁷⁷ 大正藏：耶

⁷⁸ 大正藏：進

⁷⁹ 大正藏：勤修；永樂北藏及龍藏：修習

或因呪術而生憍慢，以是因緣不能苦行，受畜細軟衣服卧具，是故一切世間惡人，為利養故往集其所而為眷屬，不能苦行。呪術力故，調伏迦葉及舍利弗、目犍連等。今復來至我所住處娑羅林中，宣說是身常、樂、我、淨，誘我弟子。大王！瞿曇先說無常、無樂、無我、無淨，我能忍之；今乃宣說常、樂、我、淨，我實不忍。惟願大王，聽我與彼瞿曇論議。」

王即答言：「諸大士，汝等今者為誰教導而令其心狂亂不定，如水濤波、旋火之輪、猿猴擲樹？是事可恥，智人若聞則⁸⁰生憐憫、愚人聞之則⁸¹生嗤笑。汝等所說，非出家相。汝若病風黃水患者，吾悉有藥能療治之；如其鬼病，家兄耆婆善能去之。汝等今者欲以手爪掬⁸²須彌山、欲以口齒齧齧金剛。諸大士，譬如愚人見師子王飢時睡眠而欲寤⁸³之，如人以指置毒蛇口，如欲以手觸灰覆火，汝等今者亦復如是。」

「善男子，譬如野狐作師子吼，猶如蟲子共金翅鳥掬行遲疾，如兔渡海欲盡其底，汝等今者亦復如是。汝若夢見勝瞿曇者，是夢狂惑，未足

⁸⁰ 大正藏：即

⁸¹ 大正藏：即

⁸² 大正藏：鉈

⁸³ 大正藏：悟

可信。諸大士，汝等今者興建是意，猶如飛蛾投大火聚。汝隨我語，不須更說。汝雖讚我平等如稱⁸⁴，勿令外人復聞此語。」

爾時，外道復作是言：「大王，瞿曇沙門所作幻術到汝邊耶？乃令大王心疑不信是等聖人。大王！不應輕蔑如是大士。大王！是月增減、大海鹹味、摩羅延山，如是等事誰之所作？豈非我等婆羅門耶？大王！不聞阿竭多仙十二年中恒河之水停耳中耶？大王！不聞瞿曇仙人現神通，十二年中變作釋身，并令釋身作羝羊形、作千女根在釋身耶？大王！不聞耆兔⁸⁵仙人一日之中飲四海水令大地乾耶？大王！不聞婆藪仙人為自在天作三眼耶？大王！不聞羅羅⁸⁶仙人變迦羅富⁸⁷城作鹵⁸⁸土耶？大王！婆羅門中有如是等大力諸仙現可檢校，大王！云何見輕蔑耶？」

王言：「諸仁者，若不見信故欲為者，如來正覺今者近在娑羅林中，汝等可往隨意問難，如來亦當為汝分別，稱汝意答。」

爾時，阿闍世王與諸外道徒眾眷屬往至佛所，

⁸⁴ 大正藏：秤

⁸⁵ 大正藏：菟

⁸⁶ 大正藏：邏

⁸⁷ 大正藏：迦羅富；永樂北藏及龍藏：迦羅富

⁸⁸ 大正藏：鹵（他本作國）；永樂北藏及龍藏：鹵

頭面作禮，右遶三匝，修敬已畢，却住一面，白佛言：「世尊！是諸外道欲隨意問難，惟⁸⁹願如來隨意答之。」

佛言：「大王且止，我自知時。」

爾時，眾中有婆羅門名闍提首那，作如是言：「瞿曇，汝說涅槃是常法耶？」

「如是，如是。大婆羅門，」

婆羅門言：「瞿曇若說涅槃常者，是義不然。何以故？世間之法從子生果，相續不斷，如從泥⁹⁰出瓶，從縷得衣。瞿曇常說：『修無常想獲得涅槃。』因是無常，果云何常？瞿曇又說：『解脫欲貪即是涅槃，解脫色貪及無色貪即是涅槃，滅無明等一切煩惱即是涅槃。』從欲乃至無明煩惱皆是無常，因是無常，所得涅槃亦應無常。瞿曇又說：『從因故生天，從因故地獄⁹¹，從因得解脫，是故諸法皆從因生。』若從因故得解脫者，云何言常？瞿曇亦說：『色從緣生，故名無常；受、想、行、識亦復如是。』如是解脫若是色者，當知無常；受、想、行、識亦復如是。若離五陰有解脫者，當知解脫即是虛空。若是虛空，不得說

⁸⁹ 大正藏：唯

⁹⁰ 大正藏：泥

⁹¹ 大正藏：墮地獄；永樂北藏及龍藏：地獄

言從因緣生。何以故？是常是一，遍一切處。瞿曇亦說：『從因生者，即是苦也。』若是苦者，云何復說解脫是樂？瞿曇又說：『無常即苦，苦即無我。』若是無常、苦、無我者，即是不淨。一切從因所生諸法皆無常、苦、無我、不淨，云何復說涅槃即是常、樂、我、淨？若瞿曇說亦常、無常，亦苦、亦樂，亦我、無我，亦淨、不淨，如是豈非是二語耶？我亦曾從先舊智人聞說是語：『佛若出世，言則無二。』瞿曇今者說於二語，復言佛即我身是也，是義云何？」

佛言：「婆羅門，如汝所說，我今問汝，隨汝意答。」

婆羅門言：「善哉！瞿曇。」

佛言：「婆羅門，汝性常耶？是無常乎？」

婆羅門言：「我性是常。」

「婆羅門，是性能作一切內外法之因耶？」

「如是。瞿曇。」

佛言：「婆羅門，云何作因？」

「瞿曇，從性生大，從大生慢，從慢生十六法，所謂地、水、火、風、空五知根，眼、耳、鼻、舌、觸⁹²五業根，手、脚、口、聲、男女二

⁹² 大正藏：身

根、心平等根，是十六法；從五法生色、聲、香、味、觸，是二十一法。根本有三：一者，染；二者，麤；三者，黑。染者名愛，麤者名瞋，黑者⁹³名無明。瞿曇，是二十五⁹⁴法皆因性生。」

「婆羅門，是大等法，常？無常耶？」

「瞿曇，我法性常，大等諸法悉是無常。」

「婆羅門，如汝法中，因常，果無常；若⁹⁵我法中，因雖無常，果是常者，有何等過？婆羅門，汝等法中有二因不？」

答言：「有。」

佛言：「云何為二？」

婆羅門言：「一者，生因；二者，了因。」

佛言：「云何生因？云何了因？」

婆羅門言：「生因者，如泥出瓶；了因者，如燈照物。」

佛言：「是二種因，因性是一。若是一者，可令生因作於了因、可令了因作生因不？」

「不也。瞿曇。」

佛言：「若使生因不作了因，了因不作生因，可得說言是因相不？」

⁹³ 大正藏：黑；永樂北藏及龍藏：黑者

⁹⁴ 大正藏：四

⁹⁵ 大正藏：然

婆羅門言：「雖不因⁹⁶作，故有因相。」

「婆羅門，了因所了即同了不？」

「不也。瞿曇。」

佛言：「我法雖從無常獲得涅槃而非無常。

婆羅門，從了因得故，常、樂、我、淨；從生因得故，無常、無樂、無我、無淨，是故如來所說有二，如是二語無有二也，是故如來名無二語。如汝所說，曾從先舊智人邊聞：『佛出於世，無有二語。』是言善哉！一切十方三世諸佛所說無差，是故說言佛無二語。云何無差？有同說有，無同說無，故名一義。婆羅門，如來世尊雖名二語，為了一語故。云何二語了於一語？如眼、色二語生識一語；乃至意、法亦復如是。」

婆羅門言：「瞿曇善能分別如是語義，我今未解所出二語了於一語。」

爾時，世尊即為宣說四真諦法：「婆羅門，苦諦⁹⁷者，亦二亦一，乃至道諦，亦二亦一。」

婆羅門言：「世尊！我已知已。」

佛言：「善男子，云何知己？」

婆羅門言：「世尊！苦諦，一切凡夫二，是

⁹⁶ 大正藏：相

⁹⁷ 大正藏：言苦諦；永樂北藏及龍藏：苦諦

聖人一；乃至道諦亦復如是。」

佛言：「善哉！已解。」

婆羅門言：「世尊！我今聞法已得正見，今當歸依佛、法、僧寶，唯願大慈聽我出家。」

爾時，世尊告憍陳如：「汝當為是闍提首那剃除鬚髮，聽其出家。」

時，憍陳如即受佛勅，為其剃髮。即下手時有二種落：一者，鬚⁹⁸髮；二者，煩惱。即於坐處得阿羅漢果。

復有梵志，姓婆私吒，復作是言：「瞿曇所說涅槃常耶？」

「如是。梵志。」

婆私吒言：「瞿曇，將不說無煩惱為涅槃耶？」

「如是。梵志。」

婆私吒言：「瞿曇，世間四種名之為無：一者，未出之法名之為無，如瓶未出泥⁹⁹時名為無瓶；二者，已滅之法名之為無，如瓶壞已名為無瓶；三者，異相互無名之為無，如牛中無馬，馬中無牛；四者，畢竟無故名之為無，如龜毛、兔角。瞿曇，若以除煩惱已名涅槃者，涅槃即無。」

⁹⁸ 大正藏：鬚

⁹⁹ 大正藏：塗

若是無者，云何言有常、樂、我、淨？」

佛言：「善男子，如是涅槃非是先無同泥¹⁰⁰時瓶，亦非滅無同瓶壞無，亦非畢竟無如龜毛、兔角，同於異無。善男子，如汝所言，雖牛中無馬，不可說言牛亦是無；雖馬中無牛，亦不可說馬亦是無。涅槃亦爾，煩惱中無涅槃，涅槃中無煩惱，是故名為異相互無。」

婆私吒言：「瞿曇，若以異無為涅槃者，夫異無者，無常、樂、我、淨。瞿曇，云何說言涅槃常、樂、我、淨？」

佛言：「善男子，如汝所說是異無者，有三種無：牛馬悉是先無後有，是名先無；已有還無，是名壞無；異相無者，如汝所說。善男子，是三種無，涅槃中無，是故涅槃常、樂、我、淨。如世病人：一者，熱病；二者，風病；三者，冷病。是三種病，三藥能治。有熱病者，酥¹⁰¹能治之；有風病者，油能治之；有冷病者，蜜能治之。是三種藥，能治如是三種惡病。善男子，風中無油，油中無風，乃至蜜中無冷，冷中無蜜，是故能治。一切眾生亦復如是，有三種病：一者，貪；二者，

¹⁰⁰ 大正藏：湑

¹⁰¹ 大正藏：蘇

瞋；三者，癡。如是三病有三種藥：不淨觀者能為貪藥，慈心觀者能為瞋藥，觀因緣智能為癡藥。善男子，為除貪故，作非貪觀；為除瞋故，作非瞋觀；為除癡故，作非癡觀。三種病中無三種藥，三種藥中無三種病。善男子，三種病中無三藥故，無常、無我、無樂、無淨；三種藥中無三種病，是故得稱常、樂、我、淨。」

婆私吒言：「世尊！如來為我說常、無常，云何為常？云何無常？」

佛言：「善男子，色是無常，解脫色常；乃至識是無常，解脫識常。善男子，若有善男子、善女人能觀色乃至識是無常者，當知是人獲得常法。」

婆私吒言：「世尊！我今已知常、無常法。」

佛言：「善男子，汝云何知常、無常法？」

婆私吒言：「世尊！我今知我色是無常，得解脫常；乃至識亦如是。」

佛言：「善男子，汝今善哉！已報是身。」

告憍陳如：「是婆私吒已證阿羅漢果，汝可施其三衣鉢器。」

時，憍陳如如佛所勅，施其衣鉢。時，婆私吒受衣鉢已，作如是言：「大德憍陳如！我今因

是弊惡之身得善果報，惟願大德，為我屈意至世尊所具宣我心。我既惡人，觸犯如來禰¹⁰²瞿曇姓，惟願為我懺悔此罪。我亦不能久住毒身，今入涅槃。」

時，憍陳如即往佛所，作如是言：「世尊！婆私吒比丘生慚愧心，自言頑嚚，觸犯如來禰瞿曇姓，不能久住是毒蛇身，今欲滅身，寄我懺悔。」

佛言：「憍陳如，婆私吒比丘已於過去無量佛所成就善根，今受我語，如法而住。如法住故，獲得正果。汝等應當供養其身。」

爾時，憍陳如從佛聞已，還其身所而設供養。時，婆私吒於焚身時作種種神足。諸外道輩見是事已，高聲唱言：「是婆私吒已得瞿曇沙門呪術，是人不久復當勝彼瞿曇沙門。」

爾時，眾中復有梵志，名曰先尼，復作是言：「瞿曇，有我耶？」如來默然。

「瞿曇，無我耶？」如來默然。

第二、第三亦如是問，佛皆默然。

先尼言：「瞿曇，若一切眾生有我、遍一切處、是一作者，瞿曇何故默然不答？」

佛言：「先尼，汝說是我遍一切處耶？」

¹⁰² 大正藏：爾；永樂北藏：禰；龍藏：稱；校勘：禰（後同）

先尼答言：「瞿曇，不但我說，一切智人亦如是說。」

佛言：「善男子，若我周遍一切處者，應當五道一時受報。若有五道一時受報，汝等梵志何因緣故，不造眾惡為遮地獄，修諸善法為受天身？」

先尼言：「瞿曇，我法中我則有二種：一、作身我；二¹⁰³、常身我。為作身我修離惡法不入地獄，修諸善法生於天上。」

佛言：「善男子，如汝說我遍一切處，如是我者若作身中，當知無常。若作身無，云何言遍？」

「瞿曇，我所立我，亦在作中，亦是常法。瞿曇，如人失火燒舍宅時，其主出去，不可說言：『舍宅被燒，主亦被燒。』我法亦爾，而此作身雖是無常，當無常時我則出去。是故我我亦遍亦常。」

佛言：「善男子，如汝說我亦遍亦常，是義不然。何以故？遍有二種：一者，常；二者，無常。復有二種：一、色；二、無色。是故若言一切有者，亦常亦無常，亦色亦無色。若言舍主得出不名無常，是義不然。何以故？舍不名主，主

¹⁰³ 大正藏：二者；永樂北藏及龍藏：二

不名舍，異燒異出故得如是。我則不爾，何以故？我即是色，色即是我，無色即我，我即無色，云何而言色無常時我則得出？善男子，汝意若謂一切眾生同一我者，如是則¹⁰⁴違世出世法。何以故？世間法名父母、子女，若我是一，父即是子，子即是父，母即是女，女即是母，怨即是親，親即是怨，此即是彼，彼即是此。是故若說一切眾生同一我者，是則¹⁰⁵違背世出世法。」

先尼言：「我亦不說一切眾生同於一我，乃說一人各有一我。」

佛言：「善男子，若言一人各有一我，是為多我，是義不然。何以故？如汝先言¹⁰⁶我遍一切，若遍一切，一切眾生業根應同，天得見時，佛得亦見；天得作時，佛得亦作；天得聞時，佛得亦聞；一切諸法皆亦如是。若天得見非佛得見者，不應說我遍一切處；若不遍者，是則¹⁰⁷無常。」

先尼言：「瞿曇，一切眾生我遍一切，法與非法不遍一切。以是義故，佛得作異，天得作異。是故瞿曇不應說言，佛得見時，天得應見；佛得聞時，天得應聞。」

¹⁰⁴ 大正藏：即

¹⁰⁵ 大正藏：即

¹⁰⁶ 大正藏：說

¹⁰⁷ 大正藏：即

佛言：「善男子，法與非法非業作耶？」

先尼言：「瞿曇，是業所作。」

佛言：「善男子，若法、非法是業作者，即是同法。云何言異？何以故？佛得業處，有天得我；天得業處，有佛得我。是故佛得作時，天得亦作，法與非法亦應如是。善男子，是故一切眾生法與非法若如是者，所得果報亦應不異。善男子，從子出果，是子終不思惟分別：『我唯當作婆羅門果，不與刹利、毗舍、首陀而作果也。』何以故？從子出果終不障閼¹⁰⁸如是四姓。法與非法亦復如是，不能分別：『我唯當與佛得作果，不與天得作果；作天得果，不作佛得果。』何以故？業平等故。」

先尼言：「瞿曇，譬如一室有百千燈，炷雖有異，明則無差。燈炷別異，喻法、非法；其明無差，喻眾生我。」

佛言：「善男子，汝說燈明以喻我者，是義不然。何以故？室異燈異，是燈光明亦在炷邊，亦遍室中。汝所言我若如是者，法、非法邊俱應有我，我中亦應有法、非法。若法、非法無有我者，不得說言遍一切處；若俱有者，何得復以炷

¹⁰⁸ 大正藏：礙

明為喻？善男子，汝意若謂炷之與明真實別異，何因緣故炷增明盛、炷枯明滅？是故不應以法、非法喻於燈炷，光明無差喻於我也。何以故？法、非法、我，三事即一。」

先尼言：「瞿曇，汝引燈喻，是事不吉。何以故？燈喻若吉，我已先引；如其不吉，何故復說？」

「善男子，我所引喻都亦不作吉，以不吉隨汝意說，是喻亦說離炷有明、即炷有明。汝心不等，故說燈炷喻法、非法，明則喻我。是故責汝，炷即是明，離炷有明；法即有我，我即有法；非法即我，我即非法。汝今何故但受一邊，不受一邊？如是喻者於汝不吉，是故我今還以破¹⁰⁹汝。善男子，如是喻者即是非喻，是非喻故，於我則¹¹⁰吉、於汝不吉。善男子，汝意若謂：『若我不吉，汝亦不吉。』是義不然。何以故？見世間人自刀自害，自作他用，汝所引喻亦復如是，於我則吉，於汝不吉。」

先尼言：「瞿曇，汝先責我心不平等，今汝所說亦不平等。何以故？瞿曇，今者以吉向己，

¹⁰⁹ 大正藏：教

¹¹⁰ 大正藏：即

不吉向我，以是推之見¹¹¹是不平。」

佛言：「善男子，如我不平能破汝不平，是故汝平我之不平即是吉也。我之不平破汝不平，令汝得平，即是我平。何以故？同諸聖人得平等故。」

先尼言：「瞿曇，我常是平，汝云何言壞我不平？一切眾生平等有我，云何言我是不平耶？」

「善男子，汝亦說言，當受地獄，當受餓鬼，當受畜生，當受人天。我若先遍五道中者，云何方言當受諸趣？汝亦說言，父母和合然後生子。若子先有，云何復言和合已有？是故一人有五趣身。若是五處先有身者，何因緣故為身造業？是故不平。善男子，汝意若謂我是作者，是義不然。何以故？若我作者，何因緣故自作苦事？然今眾生實有受苦，是故當知我非作者。若言是苦非我所作，不從因生，一切諸法亦當如是不從因生，何因緣故說我作耶？善男子，眾生苦樂實從因緣，如是苦樂能作憂喜，憂時無喜，喜時無憂，或喜或憂，智人云何說是常耶？」

「善男子，汝說我常，若是常者，云何說有

¹¹¹ 大正藏：真

十時別異？常法不應有歌羅羅¹¹²乃至老時。虛空常法尚無一時，況有十時？善男子，我者非是歌羅羅¹¹³時乃至老時，云何說有十時別異？

「善男子，若我作者，是我亦有盛時衰時，眾生亦有盛時衰時。若我爾者，云何是常？善男子，我若作者，云何一人有利有鈍？善男子，我若作者，是我能作身業、口業、意業。若是我所作者，云何口說無有我耶？云何自疑有耶？無耶？」

「善男子，汝意若謂離眼有見，是義不然。何以故？若離眼已別有見者，何須此眼？乃至身根亦復如是。汝意若謂：『我雖能見，要因眼見。』是亦不然。何以故？如有人言：『須曼那華能燒大村。云何能燒？因火能燒。』汝立我見，亦復如是。」

先尼言：「瞿曇，如人執鎌則能刈草；我因五根見聞至觸亦復如是。」

「善男子，鎌人¹¹⁴各異，是故執鎌能有所作。離根之外更無別我，云何說言我因諸根能有所作？善男子，汝意若謂：『執鎌能刈，我亦如是。』是

¹¹² 大正藏：歌羅邏時；永樂北藏及龍藏：歌羅羅

¹¹³ 大正藏：邏

¹¹⁴ 大正藏：人鎌；永樂北藏及龍藏：鎌人

我有手耶？為無手乎？若有手者，何不自執？若無手者，云何說言我是作者？善男子，能刈草者即是鎌也，非我非人。若我人能，何故因鎌？善男子，人有二業：一則執草；二則執鎌¹¹⁵。是鎌唯有能斷之功，眾生見法亦復如是。眼能見色從和合生，若從因緣和合見者，智人云何說言有我？

「善男子，汝意若謂身作我受，是義不然。何以故？世間不見天得作業、佛得受果。若言非¹¹⁶是身作、我非因受，汝等何故從於因緣求解脫耶？汝先是身非因緣生，得解脫已，亦應非因而更生身。如身，一切煩惱亦應如是。」

先尼言：「瞿曇，我有二種：一者，有知；二者，無知。無知之我能得於身，有知之我能捨離身。猶如坏瓶，既被燒已，失於本色，更不復生；智者煩惱亦復如是，既滅壞已，終不更生¹¹⁷。」

佛言：「善男子，所言知者，智能知耶？我能知乎？若智能知，何故說言我是知耶？若我知者，何故方便更求於知¹¹⁸？汝意若謂我因智知，同華喻壞。善男子，譬如刺樹，性自能刺，不得

¹¹⁵ 大正藏：二者、執鎌；永樂北藏及龍藏：二、則執鎌

¹¹⁶ 大正藏：不

¹¹⁷ 大正藏：更不復生；永樂北藏及龍藏：終不更生

¹¹⁸ 大正藏：智

說言樹執刺刺；智亦如是，智自能知，云何說言我執智知？

「善男子，如汝法中，我得解脫，無知我得？知我得耶？若無知得，當知猶故具足煩惱；若知得者，當知已有五情諸根。何以故？離根之外別更無知。若具諸根，云何復名得解脫耶？若言是我其性清淨，離於五根，云何說言遍五道有？以何因緣為解脫故修諸善法？善男子，譬如有人拔虛空刺，汝亦如是。我若清淨，云何復言斷諸煩惱？汝意若謂不從因緣獲得解脫，一切畜生何故不得？」

先尼言：「瞿曇，若無我者，誰能憶念？」

佛告先尼：「若有我者，何緣復忘？善男子，若念是我者，何因緣故，念於惡念，念所不念，不念所念？」

先尼復言：「瞿曇，若無我者，誰見？誰聞？」

佛言：「善男子，內有六入，外有六塵，內外和合生六種識，是六種識因緣得名。善男子，譬如一火，因木得故名為木火，因草得故名為草火，因糠得故名為糠火，因牛糞得名牛糞火；眾生意識亦復如是，因眼、因色、因明、因欲名為眼識。善男子，如是眼識不在眼中，乃至欲中，

四事和合故生是識，乃至意識亦復如是。若是因緣和合故生，智不應說見即是我，乃至觸即是我。善男子，是故我說眼識乃至意識，一切諸法即是幻也。云何如幻？本無今有，已有還無。善男子，譬如酥¹¹⁹麵、蜜、薑、胡椒、葷芩、蒲萄、胡桃、石榴、櫻子，如是和合名歡喜丸，離是和合無歡喜丸。內外六入是名眾生、我、人、士夫，離內外入無別眾生、我、人、士夫。」

先尼言：「瞿曇，若無我者，云何說言我見、我聞、我苦、我樂、我憂、我喜？」

佛言：「善男子，若言我見我聞名有我者，何因緣故世間復言，汝所作罪，非我見聞？善男子，譬如四兵和合名軍，如是四兵不名為一，而亦說言我軍勇健、我軍勝彼。是內外入和合所作亦復如是，雖不是一，亦得說言我作、我受、我見、我聞、我苦、我樂。」

先尼言：「瞿曇，如汝所言，內外和合，誰出聲言我作我受？」

佛言：「先尼，從愛無明因緣生業，從業生有，從有出生無量心數，心生覺觀，覺觀動風，風隨心觸喉、舌、齒、脣，眾生想倒聲出說言我

¹¹⁹ 大正藏：蘇

作、我受、我見、我聞。善男子，如幢頭鈴，風因緣故便出音聲，風大聲大，風小聲小，無有作者。善男子，譬如熱鐵，投之水中，出種種聲，是中真實無有作者。善男子，凡夫不能思惟分別如是事故，說言有我及有所、我作、我受。」

先尼言：「如瞿曇說無我、我所，何緣復說常、樂、我、淨？」

佛言：「善男子，我亦不說內外六入及六意識¹²⁰常、樂、我、淨。我乃宣說滅內外入所生六識名之為常；以是常故，名之為我；有常我故，名之為樂；常我樂故，名之為淨。善男子，眾生厭苦，斷是苦因，自在遠離，是名為我。以是因緣，我今宣說常、樂、我、淨。」

先尼言：「世尊！惟願大慈為我宣說，我當云何獲得如是常、樂、我、淨？」

佛言：「善男子，一切世間從本已來，具足大慢，能增長慢，亦復造作慢因、慢業，是故今者受慢果報，不能遠離一切煩惱，得常、樂、我、淨。若諸眾生欲得遠離一切煩惱，先當離慢。」

先尼言：「世尊！如是，如是，誠如聖教。我先有慢，因慢因緣故稱如來禰瞿曇姓。我今已

¹²⁰ 大正藏：識意；永樂北藏及龍藏：意識

離如是大慢，是故誠心啟請求法，云何當得常、樂、我、淨？」

佛言：「善男子，諦聽！諦聽！今當為汝分別解說。善男子，若能非自、非他、非眾生者，遠離是法。」

先尼言：「世尊！我已知解，得正法眼。」

佛言：「善男子，汝云何言¹²¹已知解已，得正法眼？」

「世尊！所言色者，非自、非他、非諸眾生；乃至識亦復如是。我如是觀，得正法眼。世尊！我今甚樂出家修道，願見聽許。」

佛言：「善來比丘。」

即時具足清淨梵行，證阿羅漢果。

外道眾中復有梵志，姓迦葉氏，復作是言：「瞿曇，身即是命，身異命異。」如來默然。第二、第三亦復如是。

梵志復言：「瞿曇，若人捨身未得後身，於其中間豈可不名身異命異？若是異者，瞿曇何故默然不答？」

「善男子，我說身、命皆從因緣，非不因緣；如身、命，一切法亦如是。」

¹²¹ 大正藏：何；永樂北藏及龍藏：何言

梵志復言：「瞿曇，我見世間有法不從因緣。」

佛言：「梵志，汝云何見世間有法不從因緣？」

梵志言：「我見大火焚燒榛木，風吹絕焰，墮在餘處，是豈不名無因緣耶？」

佛言：「善男子，我說是火亦從因生，非不從因。」

梵志言：「瞿曇，絕焰去時不因薪炭，云何而言因於因緣？」

佛言：「善男子，雖無薪炭，因風而去，風因緣故，其焰不滅。」

「瞿曇，若人捨身未得後身，中間壽命誰為因緣？」

佛言：「梵志，無明與愛而為因緣。是無明、愛二因緣故，壽命得住。善男子，有因緣故，身即是命，命即是身；有因緣故，身異命異。智者不應一向而說身異命異。」

梵志言：「世尊！惟願為我分別解說，令我了了得知因果。」

佛言：「梵志！因即五陰，果亦五陰。善男子，若有眾生不然火者，是則無煙。」

梵志言：「世尊！我已知已，我已解已。」

佛言：「善男子，汝云何知？云何解？」

「世尊！火即煩惱，能於地獄、餓鬼、畜生、人、天燒然；煙者，即是煩惱果報，無常、不淨、臭穢可惡，是故名煙。若有眾生不作煩惱，是人則無煩惱果報。是故如來說不然火則無有煙。世尊！我已正見，惟願慈矜，聽我出家。」

爾時，世尊告憍陳如：「聽是梵志出家受戒。」

時，憍陳如受佛勅已，和合眾僧聽其出家，受具足戒。經五日已，得阿羅漢果。

外道眾中，復有梵志，名曰富那，復作是言：「瞿曇，汝見世間是常法已，說言常耶？如是義者，實耶？虛耶？常、無常，亦常亦無常¹²²，非常非無常；有邊、無邊，亦有邊無邊¹²³，非有邊無邊¹²⁴；是身是命，身異命異；如來滅後，如去、不如去，亦如去不如去，非如去非不如去？」

佛言：「富那，我不說世間常、虛、實，常、無常¹²⁵，亦常、無常，非常非無常；有邊、無邊，亦有邊無邊，非有邊非無邊；是身是命，身異命異；如來滅後，如去、不如去，亦如去不如去，非如去非不如去。」

富那復言：「瞿曇，今者見何罪過不作是說？」

¹²² 大正藏：無常；永樂北藏及龍藏：亦無常

¹²³ 大正藏：亦無邊；永樂北藏及龍藏：無邊

¹²⁴ 大正藏：非無邊；永樂北藏及龍藏：無邊

¹²⁵ 大正藏：常、無常；永樂北藏及龍藏：無常；校勘：常、無常

佛言：「富那，若有人說世間是常，唯此為實，餘妄語者，是名為見。見所見處，是名見行、是名見業、是名見著、是名見縛、是名見苦、是名見取、是名見怖、是名見熱、是名見纏。富那，凡夫之人為見所纏，不能遠離生、老、病、死，迴流六趣，受無量苦，乃至非如去非不如去亦復如是。富那，我見是見有如是過，是故不著，不為人說。」

「瞿曇，若見如是罪過不著不說。瞿曇今者何見？何著？何所宣說？」

佛言：「善男子，夫見著者，名生死法。如來已離生死法故，是故不著。善男子，如來名為能見能說，不名為著。」

「瞿曇，云何能見？云何能說？」

佛言：「善男子，我能明見苦、集、滅、道，分別宣說如是四諦。我見如是故能遠離一切見、一切愛、一切流、一切慢。是故我具清淨梵行，無上寂靜，獲得常身，是身亦非東、西、南、北。」

富那言：「瞿曇，何因緣故常身非是東、西、南、北？」

佛言：「善男子，我今問汝，隨汝意答。於

意云何？如於¹²⁶汝前然大火聚，當其然時，汝知然不？」

「如是。瞿曇。」

「是火滅時，汝知滅不？」

「如是。瞿曇。」

「富那，若有人問：『汝前火聚然從何來？滅何所至？』當云何答？」

「瞿曇，若有問者，我當答言：『是火生時賴於眾緣。本緣已盡，新緣未至，是火則滅。』」

「若復有問：『是火滅已，至何方面？』復云何答？」

「瞿曇，我當答言：『緣盡故滅，不至方所。』」

「善男子，如來亦爾，若有無常色乃至無常識，因愛故然，然者即受二十五有，是故然時可說是火東、西、南、北。現在愛滅，二十五有果報不然，以不然故，不可說有東、西、南、北。善男子，如來已滅無常之色至無常識，是故身常。身若是常，不得說有東、西、南、北。」

富那言：「欲¹²⁷說一喻，惟願聽采¹²⁸。」

佛言：「善哉！善哉！隨意說之。」

¹²⁶ 大正藏：善男子，如於；永樂北藏及龍藏：如於

¹²⁷ 大正藏：請

¹²⁸ 大正藏：採

「世尊！如大村外有娑羅林，中有一樹，先林而生，足一百年。是時，林主灌之以水，隨時修治。其樹陳朽，皮膚枝葉悉皆脫落，唯貞實在。如來亦爾，所有陳故悉已除盡，唯有一切真實法在。世尊！我今甚樂出家修道。」

佛言：「善來比丘。」

說是語已，即時出家，漏盡證得阿羅漢果。

大般涅槃經卷第三十五

大般涅槃經卷第三十六

北涼天竺三藏曇無讖譯 梵

宋沙門慧嚴慧觀同謝靈運再治

憍陳如品二十五之二¹²⁹

復有梵志名淨¹³⁰，作如是言：「瞿曇，一切眾生不知何法見世間常、無常、亦常無常、非有常非無常，乃至非如去非不如去？」

佛言：「善男子，不知色故，乃至不知識故，見世間常，乃至非如去、非不如去。」

梵志言：「瞿曇，眾生知何法故不見世間常，乃至非如去、非不如去？」

佛言：「善男子，知色故乃至知識故，不見世間常，乃至非如去、非不如去。」

梵志言：「世尊！惟願為我分別解說世間常、無常。」

佛言：「善男子，若人捨故，不造新業，是人能知常與無常。」

梵志言：「世尊！我已知解¹³¹。」

¹²⁹ 大正藏：憍陳如品下；永樂北藏及龍藏：憍陳如品二十五之二

¹³⁰ 大正藏：復有梵志名曰清淨淨；永樂北藏及龍藏：復有梵志名淨

¹³¹ 大正藏：見

佛言：「善男子，汝云何見？汝云何知？」

「世尊！‘故’名無明與愛；‘新’名取、有。若人遠離是無明、愛，不作取、有，是人真實知常、無常。我今已得正法淨眼，歸依三寶，惟願如來聽我出家。」

佛告憍陳如：「聽是梵志出家受戒。」

時，憍陳如受佛勅已，將至僧中，為作羯磨，令得出家，十五日後，諸漏永盡，得阿羅漢果。

犢子梵志復作是言：「瞿曇，我今欲問，能見聽不？」

如來默然。第二、第三亦復如是。

犢子復言：「瞿曇，我久與汝共為親友，汝之與我，義無有二。我欲諮問，何故默然？」

爾時，世尊作是思惟：「如是梵志其性儒雅，純善質直，常為知故而來諮啟，不為惱亂。彼若問者，當隨意答。」

佛言：「犢子，善哉！善哉！隨所疑問，吾當答之。」

犢子言：「瞿曇，世有善耶？」

「如是。梵志。」

「有不善耶？」

「如是。梵志。」

「瞿曇，願為我說，令我得知善、不善法。」

佛言：「善男子，我能分別廣說其義，今當為汝簡略說之。善男子，欲名不善，解脫欲者名之為善；瞋恚、愚癡亦復如是。殺名不善，不殺名善；乃至邪見亦復如是。善男子，我今為汝已說三種善、不善法及說十種善、不善法。若我弟子能作如是分別三種善、不善法，乃至十種善、不善法，當知是人能盡貪欲、瞋恚、愚癡、一切諸漏，斷一切有。」

梵志言：「瞿曇，是佛法中頗有一比丘能盡如是貪欲、恚¹³²癡、一切諸漏、一切有不？」

佛言：「善男子，是佛法中，非一、二、三乃至五百，乃有無量諸比丘等，能盡如是貪欲、恚、癡、一切諸漏、一切諸有。」

「瞿曇，置一比丘，是佛法中，頗有一比丘尼能盡如是貪欲、瞋癡、一切諸漏、一切有不？」

佛言：「善男子，是佛法中，非一、二、三乃至五百，乃有無量諸比丘尼，能斷如是貪欲、瞋、癡、一切諸漏、一切諸有。」

犢子言：「瞿曇，置一比丘、一比丘尼，是佛法中，頗有一優婆塞持戒精勤，梵行清淨，度

¹³² 大正藏：瞋

疑彼岸，斷於疑網¹³³？」

佛言：「善男子，我佛法中，非一、二、三乃至五百，乃有無量諸優婆塞持戒精勤，梵行清淨，斷五下結，得阿那含，度疑彼岸，斷於疑網。」

犢子言：「瞿曇，置一比丘、一比丘尼、一優婆塞，是佛法中，頗有一優婆夷持戒精勤，梵行清淨，度疑彼岸，斷疑網不？」

佛言：「善男子，我佛法中，非一、二、三乃至五百，乃有無量諸優婆夷持戒精勤，梵行清淨，斷五下結，得阿那含，度疑彼岸，斷於疑網。」

犢子言：「瞿曇，置一比丘、一比丘尼盡一切漏，一優婆塞、一優婆夷持戒精勤，梵行清淨，斷於疑網。是佛法中，頗有優婆塞受五欲樂，心無疑網不？」

佛言：「善男子，是佛法中，非一、二、三乃至五百，乃有無量諸優婆塞斷於三結，得須陀洹；薄貪、恚、癡，得斯陀含。如優婆塞，優婆夷亦如是。」

「世尊！我於今者樂說譬喻。」

佛言：「善哉！善哉！樂說便說。」

「世尊！譬如難陀、婆¹³⁴難陀龍王等降大雨，

¹³³ 大正藏：斷於疑網不；永樂北藏及龍藏：斷於疑網

如來法雨亦復如是，平等雨於優婆塞、優婆夷。世尊！若諸外道欲來出家，不審如來幾月試之？」

佛言：「善男子，皆四月試，不必一種。」

「世尊！若不一種，惟願大慈聽我出家。」

爾時，世尊告憍陳如：「聽是犢子出家受戒。」

時，憍陳如受佛勅已，立眾僧中，為作羯磨。

於出家後滿十五日，得須陀洹果。既得果已，復作是念：「若有智慧從學得者，我今已得，堪任見佛。」即往佛所，頭面作禮，修敬已畢，却住一面，白佛言：「世尊！諸有智慧從學得者，我今已得。惟願為我重分別說，令我獲得無學智慧。」

佛言：「善男子，汝勤精進修習二法：一、奢摩他；二、毗婆舍那。善男子，若有比丘欲得須陀洹果，亦當勤修如是二法；若復欲得斯陀含果、阿那含果、阿羅漢果，亦當修習如是二法。善男子，若有比丘欲得四禪、四無量心、六神通、八背捨、八勝處、無諍智、頂智、畢竟智、四無閼¹³⁵智、金剛三昧、盡智、無生智，亦當修習如是二法。善男子，若欲得十住地、無生法忍、無相法忍、不可思議法忍、聖行、梵行、天行、菩

¹³⁴ 大正藏：婆；永樂北藏：婆；龍藏：波；校勘：婆

¹³⁵ 大正藏：礙

薩行、虛空三昧、智印三昧、空無相無作三昧、地三昧、不退三昧、首楞¹³⁶嚴三昧、金剛三昧、阿耨多羅三藐三菩提佛行，亦當修習如是二法。」

犢子聞已，禮拜而出，在娑羅林中修是二法，不久即得阿羅漢果。

是時，復有無量比丘欲往佛所，犢子見已，問言：「大德！欲何所至？」

諸比丘言：「欲往佛所。」

犢子復言：「諸大德！若至佛所，願為宣啟：『犢子梵志修二法已，得無學智，今報佛恩，入般涅槃。』」

時，諸比丘至佛所已，白佛言：「世尊！犢子比丘寄我等語：『世尊！犢子梵志修習二法，得無學智，今報佛恩，入於涅槃。』」

佛言：「善男子，犢子梵志得阿羅漢果，汝等可往供養其身。」

時，諸比丘受佛勅已，還其尸所大設供養。

納衣梵志復作是言：「瞿曇，如瞿曇所說¹³⁷，『無量世中，作善、不善，未來還得善、不善身。』是義不然。何以故？如瞿曇說：『因煩惱故，獲

¹³⁶ 大正藏：楞；永樂北藏及龍藏：稜；校勘：楞

¹³⁷ 大正藏：如瞿曇說；永樂北藏及龍藏：瞿曇，如瞿曇所說

得是身。』若因煩惱獲得身者，身為在先？煩惱在先？若煩惱在先，誰之所作？住在何處？若身為在先，云何說言因煩惱得？是故若言煩惱在先，是則不可；若身為在先，是亦不可；若言一時，又亦不可；先後一時，義皆不可。是故我說一切諸法皆有自性，不從因緣。

「復次，瞿曇，堅是地性，濕是水性，熱是火性，動是風性，無所罣闔是虛空性，是五大性非因緣有。若使世間有一法性非因緣有，一切法性亦應如是非因緣有。若有一法從因緣有，何因緣故五大之性不從因緣？瞿曇，眾生善身及不善身獲得解脫，皆是自性，不從因緣。是故我說一切諸法自性故有，非因緣生。

「復次，瞿曇，世間之法有定用處。譬如工匠云如是木任作車輿，如是任作門戶、床几¹³⁸；亦如金師所可造作，在額上者名之為鬘，在頸下者名之為纓¹³⁹，在臂上者名之為釧，在指上者名之為環。用處定故，名為定性。一切¹⁴⁰眾生亦復如是，有五道性故，有地獄、餓鬼、畜生、人、天。若如是者，云何說言從於因緣？

¹³⁸ 大正藏：机

¹³⁹ 大正藏：璫

¹⁴⁰ 大正藏：瞿曇，一切；永樂北藏及龍藏：一切

「復次，瞿曇，一切眾生其性各異，是故名為一切自性。如龜陸生¹⁴¹自能入水、犢子生已自能¹⁴²飲乳、魚見鈎餌自然吞食、毒蛇生已自然食土，如是等事，誰有教者？如刺生已自然頭尖，飛鳥毛羽自然色別，世間眾生亦復如是，有利、有鈍，有富、有貧，有好、有醜，有得解脫、有得不¹⁴³有。是故當知，一切法中各自有¹⁴⁴性。

「復次，瞿曇說¹⁴⁵：『貪欲、瞋、癡從因緣生，如是三毒因緣五塵。』是義不然。何以故？眾生睡時，遠離五塵，亦復生於貪欲、瞋、癡；在胎亦爾，初出胎時，未能分別五塵好、醜，亦復生於貪欲、瞋、癡。諸仙賢聖處閑寂處無有五塵，亦能生於貪欲、瞋、癡。亦復有人因於五塵生於不貪、不瞋、不癡。是故不必從於因緣生一切法，以自性故。

「復次，瞿曇，我見世人，五根不具，多饒財寶，得大自在；有根具足，貧窮下賤，不得自在，為人僕使。若有因緣，何故如是？是故諸法各有自性，不由因緣。

¹⁴¹ 大正藏：瞿曇，如龜陸生；永樂北藏及龍藏：如龜陸生

¹⁴² 大正藏：能自；永樂北藏及龍藏：自能

¹⁴³ 大正藏：下

¹⁴⁴ 大正藏：有自；永樂北藏及龍藏：自有

¹⁴⁵ 大正藏：如瞿曇說；永樂北藏及龍藏：瞿曇說

「復次，瞿曇，世間小兒，亦復未能分別五塵，或笑或啼，笑時知喜，啼時知愁。是故當知，一切諸法各有自性。

「復次，瞿曇，世法有二：一者，有；二者，無。有即虛空，無即兔角。如是二法，一是有故，不從因緣；二是無故，亦非因緣。是故諸法有自性故，不從因緣。」

佛言：「善男子，如汝所言：『如五大性，一切諸法亦應如是。』是義不然。何以故？善男子，汝法中以五大是常，何因緣故一切諸法悉不是常？若世間物是無常者，是五大性何因緣故不是無常？若五大常，世間之物亦應是常。是故汝說『五大之性有自性故，不從因緣，令一切法同五大』者，無有是處。

「善男子，汝言用處定故有自性者，是義不然。何以故？皆從因緣得名字故。若從因得名，亦從因得義。云何名為從因得名？如在額上名之為鬘、在頸名纓¹⁴⁶、在臂名釧、在車名輪、火在草木名草木火。善男子，木初生時無箭稍性，從因緣故工造為箭、從因緣故工造為稍，是故不應說一切法有自性也。

¹⁴⁶ 大正藏：璵

「善男子，汝言：『如龜陸生，性自入水；犢子生¹⁴⁷已，性能飲乳。』是義不然。何以故？若言入水非因緣者，俱非因緣，何不入火？犢子生已性能嗽¹⁴⁸乳不從因緣，俱非因緣，何不嗽¹⁴⁹角？

「善男子，若言：『諸法悉有自性，不須教習，無有增長。』是義不然。何以故？今見有教，緣教增長，是故當知無有自性。

「善男子，若一切法有自性者，諸婆羅門一切不應為清淨身，殺羊祀祠¹⁵⁰。若為身祠，是故當知無有自性。

「善男子，世間語法凡有三種：一者，欲作；二者，作時；三者，作已。若一切法有自性者，何故世中有是三語？有三語故，故知一切無有自性。

「善男子，若言諸法有自性者，當知諸法各有定性。若有定性，甘蔗一物，何緣作漿、作蜜、石蜜酒、苦酒等？若有一性，何緣乃出如是等物¹⁵¹？若一物中出如是等，當知諸法不得一定各有

¹⁴⁷ 大正藏：子生；永樂北藏及龍藏：生子；校勘：子生

¹⁴⁸ 大正藏：唼

¹⁴⁹ 大正藏：唼

¹⁵⁰ 大正藏：祠祀；永樂北藏及龍藏：祀祠

¹⁵¹ 大正藏：味

一性。善男子，若一切法有定性者，聖人何故飲甘蔗漿，石蜜、黑蜜酒時不飲，後為苦酒復還得飲？是故當知無有定性。若無定性，云何不因因緣而有？

「善男子，汝說一切法有自性者，云何說喻？若有喻者，當知諸法無有自性。若有自性，當知無喻。世間智者皆說譬喻，當知諸法無有自性、無有一性。

「善男子，汝言『身為在先？煩惱在先？』者，是義不然。何以故？若我當說身在先者，汝可難言：『汝亦同我，身不在先。』何因緣故而作是難？善男子，一切眾生身及煩惱俱無先後，一時而有。雖一時有，要因煩惱而得有身，終不因身有煩惱也。

「汝意若謂『如人二眼一時而得，不相因待，左不因右，右不因左，煩惱及身亦如是。』者，是義不然。何以故？世間¹⁵²眼見炷之與明，雖復一時，明要因炷，終不因明而有炷也。

「善男子，汝意若謂：『身不在先，故知無因。』是義不然。何以故？若以身先無因緣故名

¹⁵² 大正藏：善男子，世間；永樂北藏及龍藏：世間

為無者，汝不應說一切法¹⁵³有因緣。若言不見故不說者，今見瓶等從因緣出，何故不說如瓶，身先因緣亦復如是？善男子，若見、不見，一切諸法皆從因緣，無有自性。

「善男子，若言一切法悉有自性無因緣者，汝何因緣說於五大？是五大性即是因緣。善男子，五大因緣雖復如是，亦不應說諸法皆同五大因緣。如世人說：『一切出家精勤持戒，旃陀羅等亦應如是精勤持戒。』善男子，汝言五大有定堅性，我觀是性轉故不定。

「善男子，酥蠟胡膠，於汝法中名之為地。是地不定，或同於水，或同於地，故不得說自性故堅。

「善男子，白鑞、鉛、錫、銅、鐵、金、銀，於汝法中名之為火。是火四性，流時水性，動時風性，熱時火性，堅時地性。云何說言定名火性？

「善男子，水性名流。若水凍時，不名為地，故名水者，何因緣故，波動之時不名為風？若動不名風，凍時亦應不名為水。若是二義從因緣者，何故說言一切諸法不從因緣？

「善男子，若言：『五根性能見、聞、覺、

¹⁵³ 大正藏：諸法皆；永樂北藏及龍藏：法

知、觸¹⁵⁴，皆是自性，不從因緣。』是義不然。何以故？善男子，自性之性不可轉。若言眼性見者，常應能見，不應有見、有不見時。是故當知，從因緣見，非無因緣。

「善男子，汝言非因五塵生貪、解脫，是義不然。何以故？善男子，生貪、解脫雖復不因五塵因緣，惡覺觀故則生貪欲，善覺觀故則得解脫。善男子，內因緣故生貪、解脫，外因緣故則能增長。是故汝言：『一切諸法各有自性，不因五塵生貪、解脫。』無有是處。

「善男子，汝言具足諸根，乏於財物，不得自在；諸根殘缺，多饒財寶，得大自在。因此以明有自性故，不從因緣者，是義不然。何以故？善男子，眾生從業而有果報，如是果報則有三種：一者，現報；二者，生報；三者，後報。貧窮巨富，根具不具，是業各異。若有自性，具諸根者應饒財寶，饒財寶者應具諸根。今則不爾，是故定知無有自性，皆從因緣。

「善男子，如汝所言『世間小兒未能分別五塵¹⁵⁵因緣，亦啼亦笑，是故一切有自性。』者，

¹⁵⁴ 大正藏：觸故；永樂北藏及龍藏：觸

¹⁵⁵ 大正藏：五塵；永樂北藏及龍藏：有從；校勘：五塵

是義不然。何以故？若自性者，笑應常笑，啼應常啼，不應一笑一啼。若一笑一啼，當知一切悉從因緣。是故不應說一切法有自性故不從因緣。」

梵志言：「世尊！若一切法從因緣有，如是身者從何因緣？」

佛言：「善男子，是身因緣，煩惱與業。」

梵志言：「世尊！如其是身從煩惱、業，是煩惱、業可斷不耶？」

佛言：「如是，如是。」

梵志復言：「世尊！惟願為我分別解說，令我聞已不移是處，悉得斷之。」

佛言：「善男子，若知二邊，中間無閼，是人則能斷煩惱、業。」

「世尊！我已知解，得正法眼。」

佛言：「汝云何知？」

「世尊！二邊即色及色解脫，中間即是八正道也。受、想、行、識亦復如是。」

佛言：「善哉！善哉！善男子，善知二邊，斷煩惱業。」

「世尊！惟願聽我出家受戒。」

佛言：「善來比丘。」

即時斷除三界煩惱，得阿羅漢果。

爾時，復有¹⁵⁶婆羅門名曰弘廣，復作是言：「瞿曇，知我今所念不？」

佛言：「善男子，涅槃是常，有為無常；曲即邪見，直即聖道。」

婆羅門言：「瞿曇，何因緣故作如是說？」

「善男子，汝意每謂：『乞食是常，別請無常；曲是戶鑰，直是帝幢。』是故我說：『涅槃是常，有為無常；曲謂邪見，直謂八正。』非如汝先所思惟也。」

婆羅門言：「瞿曇，實知我心。是八正道悉令眾生得盡滅不？」

爾時，世尊默然不答。

婆羅門言：「瞿曇，已知我心，我今所問，何故默然而不見答？」

時，憍陳如即作是言：「大婆羅門，若有問世有邊無邊，如來常爾默然不答。八聖是直，涅槃是常。若修八聖即得滅盡，若不修習即¹⁵⁷不能得。」

「大婆羅門，譬如大城，其城四壁都無孔竅，唯有一門。其守門者，聰明有智，能善分別，可

¹⁵⁶ 大正藏：有一；永樂北藏及龍藏：有

¹⁵⁷ 大正藏：則

放則放，可遮則遮，雖不能知出入多少，定知一切有入出者皆由此門。善男子，如來亦爾，城喻涅槃，門喻八正，守門之人喻於如來。善男子，如來今者雖不答汝盡與不盡，其有盡者，要當修習是八正道。」

婆羅門言：「善哉！善哉！大德憍陳如，如來善能說微妙法，我今實欲知城知道，自作守門。」

憍陳如言：「善哉！善哉！汝婆羅門能發無上廣大之心。」

佛言：「止！止！憍陳如，是婆羅門非適今日發是心也。乃往過去過無量劫¹⁵⁸，有佛世尊，名普光明如來、應、正遍知、明行足、善逝、世間解、無上士、調御丈夫、天人師、佛、世尊。是人先已於彼佛所發阿耨多羅三藐三菩提心，此賢劫中當得作佛，久已通達了知法相，為眾生故，現處外道，示無所知。以是因緣，汝憍陳如，不應讚言：『善哉！善哉！汝今能發如是大心。』」

爾時，世尊知已，即告憍陳如言：「阿難比丘今為所在？」

憍陳如言：「世尊！阿難比丘在娑羅林外，去此大會十二由旬，而為六萬四千億魔之所嬈亂。」

¹⁵⁸ 大正藏：劫；永樂北藏及龍藏：佛；校勘：劫

是諸魔眾，悉自變身為如來像，或有宣說一切諸法從因緣生，或有說言一切諸法不從因生；或有說言一切因緣皆是常法，因¹⁵⁹緣生者悉是無常；或有說言五陰是實，或說虛假，入、界亦爾；或有說言有十二緣，或有說言正有四緣；或說諸法如幻、如化、如熱時焰；或有說言因聞得法，或有說言因思得法，或有說言因修得法；或復有說不淨觀法，或復有說出息入息，或復有說四念處觀，或復有說三種觀義、七種方便，或復有說煖法、頂法、忍法、世間第一法、學無學地、菩薩初住乃至十住，或有說空、無相、無作，或復有說修多羅、祇夜、毗伽羅那、伽陀、憂陀那、尼陀那、阿波陀那、伊帝目多伽、闍陀伽、毗佛略、阿浮陀達摩、憂¹⁶⁰波提舍，或說四念處、四正勤、四如意足、五根、五力、七覺分¹⁶¹、八聖道，或說內空、外空、內外空、有為空、無為空、無始空、性空、遠離空、散空、自相空、無相空、陰空、入空、界空、善空、不善空、無記空、菩提空、道空、涅槃空、行空、得空、第一義空、空空、大空，或有示現神通變化，身出水火，或身

¹⁵⁹ 大正藏：從

¹⁶⁰ 大正藏：優

¹⁶¹ 大正藏：七覺分；永樂北藏及龍藏：七覺；校勘：七覺分

上出水身下出火，身下出水身上出火，左脅在下右脅出水，右脅在下左脅出水，一脅震雷一脅降雨；或有示現諸佛世界；或復示現菩薩初生，行至七步，處在深宮受五欲時，初始出家修苦行時，往菩提樹坐三昧時，壞魔軍眾轉法輪時，示大神通入涅槃時。

「世尊！阿難比丘見是事已，作是念言：『如是神變，昔來未見，誰之所作？將非世尊釋迦作耶？』欲起欲語都不從意。阿難比丘入魔羅故，復作是念：『諸佛所說各各不同，我於今者當受誰語？』」

「世尊！阿難今者極受大苦，雖念如來，無能救者。以是因緣，不來至此大眾之中。」

爾時，文殊師利菩薩摩訶薩白佛言：「世尊！此大眾中，有諸菩薩已於一生發阿耨多羅三藐三菩提心，至無量生發菩提心，已能供養無量諸佛，其心堅固，具足修行檀波羅蜜乃至般若波羅蜜，成就功德，久已親近無量諸佛，淨修梵行，得不退轉菩提之心，得不退忍、不退轉持，得如法忍、首楞嚴等無量三昧。如是等輩，聞大乘經終不生疑，善能分別宣說三寶同一性相常住不變，聞不思議不生驚怪，聞種種空心不怖懼，了了通達一

切法性，能持一切十二部經廣解其義，亦能受持無量諸佛十二部經，何憂不能受持如是大涅槃典？何因緣故問憍陳如阿難所在？」

爾時，世尊告文殊師利：「諦聽！諦聽！善男子，我成佛已，過三¹⁶²十年住王舍城。爾時，我告諸比丘言：『今此¹⁶³眾中，誰能為我受持如來十二部經，供給左右所須之事，亦使不失自身善利？』

「時，憍陳如在彼眾中來白我言：『我能受持十二部經，供給左右，不失所作自利益事。』我言：『憍陳如，汝已朽邁，當須使人，云何方欲為我給使？』時，舍利弗復作是言：『我能受持佛一切語，供給所須，不失所作自利益事。』我言：『舍利弗，汝已朽邁，當須使人。云何方欲為我給使？』乃至五百諸阿羅漢皆亦如是，我悉不受。

「爾時，目連在大眾中作是思惟：『如來今者不受五百比丘給使，佛意為欲令誰作耶？』思惟是已，即便入定，觀見如來心在阿難，如日初出，光照西壁。見是事已，即從定起，語憍陳如：

¹⁶² 大正藏：二

¹⁶³ 大正藏：諸比丘，今此；永樂北藏及龍藏：今此

『大德！我見如來欲令阿難給事左右。』

「時¹⁶⁴，憍陳如與五百阿羅漢往阿難所，作如是言：『阿難，汝今當為如來給使，請受是事。』阿難言：『諸大德！我實不堪給事如來。何以故？如來尊重如師子王、如龍、如火，我今穢弱，云何能辦？』諸比丘言：『汝受我語¹⁶⁵，給事如來得大利益。』第二、第三亦復如是。阿難言：『諸大德！我亦不求大利益事，實不堪任奉給左右。』

「時目犍¹⁶⁶連復作是言：『阿難，汝今未知。』阿難言：『大德！惟願說之。』目犍連言：『如來先日僧中求使，五百羅漢皆求為之，如來不聽。我即入定，見如來意欲令汝作¹⁶⁷。汝今云何反更不受？』阿難聞已，合掌長跪作如是言：『諸大德！若有是事，如來世尊與我三願，當順僧命，給事左右。』目犍連言：『何等三願？』阿難言：『一者，如來設以故衣賜我，聽我不受；二者，如來設受檀越別請，聽我不從¹⁶⁸；三者，聽我出入無有時節。如是三事佛若聽者，當順僧命。』時，憍陳如、五百比丘還來我所，作如是言：『我

¹⁶⁴ 大正藏：爾時；永樂北藏及龍藏：時

¹⁶⁵ 大正藏：阿難，汝受我語；永樂北藏及龍藏：汝受我語

¹⁶⁶ 大正藏：犍

¹⁶⁷ 大正藏：為

¹⁶⁸ 大正藏：往

等已勸阿難比丘，唯求三願。若佛聽者，當順僧命。』

「文殊師利，我於爾時讚阿難言：『善哉！善哉！阿難比丘具足智慧，豫¹⁶⁹見譏嫌。何以故？當有人言：「汝為衣食，奉給如來。」是故先求不受故衣、不隨別請。憍陳如，阿難比丘具足智慧，入出有時，則¹⁷⁰不能得廣作利益四部之眾。是故求欲出入無時。憍陳如，我為阿難開是三事，隨其意願。』

「時，目犍連還阿難所，語阿難言：『吾已為汝啟請三事，如來大慈，皆已聽許。』阿難言：『大德！若佛聽者，請往給侍。』

「文殊師利，阿難事我二十餘年，具足八種不可思議。何等為八？一者，事我已來二十餘年，初不隨我受別請食。二者，事我已來，初不受我陳故衣服。三者，自事我來，至我所時，終不非時。四者，自事我來，具足煩惱，隨有¹⁷¹入出諸王、刹利、豪貴、大姓，見諸女人及天龍女不生欲心。五者，自事我來，持我所說十二部經，一經於耳曾不再問，如瀉¹⁷²瓶水置之一瓶，唯除一

¹⁶⁹ 大正藏：預

¹⁷⁰ 大正藏：即

¹⁷¹ 大正藏：我

¹⁷² 大正藏：寫

問。善男子，瑠璃太子殺諸釋氏，壞迦毗羅城。阿難爾時心懷愁惱，發聲大哭，來至我所作如是言：『我與如來俱生此城，同一釋種，云何如來光顏如常，我則憔悴？』我時答言：『阿難，我修空定，故不同汝。』過三年已，還來問我：『世尊！我往於彼迦毗羅城，曾聞如來修空三昧，是事虛實？』我言：『阿難，如是，如是，如汝所說。』六者，自事我來，雖未獲得知他心智，常知如來所入諸定。七者，自事我來，未得願智而能了知如是眾生到如來所，現在能得四沙門果，有後得者，有得人身，有得天身。八者，自事我來，如來所有祕密之言，悉能了知。善男子，阿難比丘具足如是八不思議，是故我稱阿難比丘為多聞藏。

「善男子，阿難比丘具足八法，能具足持十二部經。何等為八？一者，信根堅固；二者，其心質直；三者，身無病苦；四者，常勤精進；五者，具足念心；六者，心無憍慢；七者，成就定意¹⁷³；八者，具足從聞生智。

「文殊師利，毗婆尸佛侍者弟子名阿叔迦，亦復具足如是八法；尸棄如來侍者弟子名差摩迦

¹⁷³ 大正藏：慧

羅，毗舍浮佛侍者弟子名優¹⁷⁴波扇陀，迦羅鳩村大¹⁷⁵佛侍者弟子名曰拔¹⁷⁶提，迦那¹⁷⁷牟尼佛侍者弟子名曰蘇坻，迦葉佛侍者弟子名葉婆蜜多，皆亦具足如是八法。我今阿難亦復如是具足八法，是故我稱阿難比丘為多聞藏。

「善男子，如汝所說，此大眾中，雖有無量無邊菩薩，是諸菩薩皆有重任，所謂大慈大悲。如是慈悲之因緣故，各各忽務，調伏眷屬，莊嚴自身。以是因緣，我涅槃後不能宣通十二部經。若有菩薩或時能說，人不信受。

「文殊師利，阿難比丘是吾之弟，給事我來二十餘年，所可聞法具足受持，喻如漚¹⁷⁸水置之一器。是故我今顧問阿難為何所在，欲令受持是涅槃經。善男子，我涅槃後，阿難比丘所未聞者，弘廣菩薩當能流布；阿難所聞，自能宣通。

「文殊師利，阿難比丘今在他處，去此會外十二由旬，而為六萬四千億魔之所惱亂。汝可往彼，發大聲音：『一切諸魔，諦聽！諦聽！如來今說大陀羅尼，一切天、龍、乾闥婆、阿修羅、

¹⁷⁴ 大正藏：憂

¹⁷⁵ 大正藏：馱

¹⁷⁶ 大正藏：跋

¹⁷⁷ 大正藏：迦那舍；永樂北藏及龍藏：迦那

¹⁷⁸ 大正藏：寫

迦樓羅、緊那羅、摩睺羅伽、人與非人、山神、樹神、河神、海神、舍宅等神，聞是持名，無不恭敬受持之者。是陀羅尼十恒河沙諸佛世尊所共宣說，能轉女身，自識宿命。若受五事：一者，梵行；二者，斷肉；三者，斷酒；四者，斷辛；五者，樂在寂靜。受五事已，至心信受、讀誦、書寫是陀羅尼，當知是人則¹⁷⁹得超越七十七億弊惡之身。』』

爾時，世尊即便說之：

「阿磨¹⁸⁰隸 毗磨¹⁸¹隸 涅槃隸 瞢伽隸
醯磨¹⁸²羅 若竭裨¹⁸³ 三曼¹⁸⁴那跋提 娑婆他娑
檀尼 婆羅磨他娑檀尼 摩¹⁸⁵那斯 阿拙啼¹⁸⁶
比¹⁸⁷羅祇 菴羅賴坻¹⁸⁸ 婆嵐彌 婆嵐摩莎隸
富泥富那摩奴賴綈」

爾時，文殊師利從佛受是陀羅尼已，至阿難所，在魔眾中，作如是言：「諸魔眷屬，諦聽我說所從佛受陀羅尼呪。」魔王聞是陀羅尼已，悉

¹⁷⁹ 大正藏：即

¹⁸⁰ 大正藏：摩

¹⁸¹ 大正藏：摩

¹⁸² 大正藏：摩

¹⁸³ 大正藏：鞞

¹⁸⁴ 大正藏：慢

¹⁸⁵ 大正藏：磨

¹⁸⁶ 大正藏：提

¹⁸⁷ 大正藏：毗

¹⁸⁸ 大正藏：低

發阿耨多羅三藐三菩提心，捨於魔業，即放阿難。文殊師利與阿難俱來至佛所，阿難見佛，至心禮敬，却住一面。

佛告阿難：「是娑羅林外，有一梵志，名須跋陀，年百二十，雖得五通，未捨憍慢，獲得非想非非想定，生一切智，起涅槃想。汝可往彼，語須跋言：『如來出世如優曇華，於今中夜當般涅槃，若有所作可及時作，莫於後日而生悔心。』阿難，汝之所說彼定信受。何以故？汝曾往昔五百世中作須跋陀子，其人愛心習猶未盡，以是因緣，信受汝語。」

爾時，阿難受佛勅已，往須跋所，作如是言：「仁者當知，如來出世如優曇華，於今中夜當般涅槃，欲有所作可及時作，莫於後日生悔心也。」須跋言：「善哉！阿難，我今當往至如來所。」

爾時，阿難與須跋陀還至佛所。

時，須跋陀到已，問訊作如是言：「瞿曇，我今欲問，隨我意答。」

佛言：「須跋，今正是時，隨汝所問，我當方便隨汝意答。」

「瞿曇，有諸沙門、婆羅門等作如是言：『一切眾生受苦樂報，皆隨往日本業因緣。是故若有

持戒精進，受身心苦，能壞本業。本業既盡，眾苦盡滅；眾苦盡滅，即得涅槃。』是義云何？」

佛言：「善男子，若有沙門、婆羅門等作是說者，我為憐憫，常當往至¹⁸⁹如是人所。既至彼已，我當問之：『仁者，實作如是說不？』彼若見答：『我如是說。何以故？瞿曇，我見眾生習行諸惡，多饒財寶，身得自在；又見修善，貧窮多乏，不得自在。又見有人多役力用，求財不得；又見不求自然得者。又見有人慈心不殺，反更中天；又見喜殺，終保年壽。又見有人淨修梵行，精勤持戒，有得解脫、有不得者。是故我說一切眾生受苦樂報，皆由往日本業因緣。』

「須跋，我復當問：『仁者，實見過去業不？若有是業，為多少耶？現在苦行能破多少耶？能知是業已盡、不盡耶？是業既盡，一切盡耶？』彼若見答：『我實不知。』我便當為彼人引喻：『譬如有人，身被毒箭，其家眷屬為請醫師令拔是箭。既拔箭已，身得安隱。其後十年，是人猶憶，了了分明：「是醫為我拔出毒箭，以藥塗傅¹⁹⁰，令我得差，安隱受樂。」仁既不知過去本業，云何

¹⁸⁹ 大正藏：來

¹⁹⁰ 大正藏：拊

能知現在苦行定能破壞過去業耶？』

「彼若復言：『瞿曇，汝今亦有過去本業，何故獨責我過去業？瞿曇經中亦作是說：「若見有人豪貴自在，當知是人先世好施。」如是不名過去業耶？』我復答言：『仁者，如是知者，名為比知，不名真知。我佛法中，或有由因知果，或有從果知因。我佛法中，存¹⁹¹過去業，有現在業。汝則不爾，唯有過去業，無現在業。汝法不從方便斷業；我法不爾，從方便斷。汝業盡已，則得苦盡；我則¹⁹²不爾，煩惱盡已，業苦則盡。是故我今責汝過去業。』

「彼人若言：『瞿曇，我實不知，從師受之。師作是說，我實無咎。』我言：『仁者，汝師是誰？』彼若見答：『是富蘭那。』我復語言：『汝昔何不一一諮問：「大師實知過去業不？」汝師若言我不知者，汝復云何受是師語？若言我知，復應問言：「下苦因緣受中、上苦不？中苦因緣受下、上苦不？上苦因緣受中、下苦不？」若言不者，復應問言：「師云何說苦樂之報唯過去業，非現在耶？」復應問言：「是現在苦，過去有不？若

¹⁹¹ 大正藏：有

¹⁹² 大正藏：即

過去有，過去之業悉已都盡。若都盡者，云何復受今日之身？若過去無，唯現在有，云何復言眾生苦樂皆過去業？」仁者，若知現在苦行能壞過去業，現在苦行復以何破？如其不破，苦即是常。苦若是常，云何說言得苦解脫？若更有行壞苦行者，過去已盡，云何有苦？仁者，如是苦行能令樂業受苦果不？復令苦業受樂果不？能令無苦無樂業作不受果不？能令現報作生報不？能令生報作現報不？令是二報作無報不？能令定報作無報不？能令無報作定報不？」

「彼若復言：『瞿曇，不能。』我復當言：『仁者，如其不能，何因緣故受是苦行？仁者當知，定有過去業、現在因緣。是故我言，因煩惱生業，因業受報。仁者當知，一切眾生有過去業，有現在因，眾生雖有過去壽業，要賴現在飲食因緣。仁者，若說眾生受苦、受樂定由過去本業因緣，是事不然。何以故？仁者，譬如有人為王除怨，以是因緣多得財寶，因是財寶受現在樂，如是之人現作樂因，現受樂報。譬如有人殺王愛子，以是因緣喪失身命，如是之人現作苦因，現受苦報。仁者，一切眾生現在因於四大、時節、土地、人民，受苦受樂，是故我說一切眾生不必盡因過去

本業受苦樂也。仁者，若以斷業因緣力故得解脫者，一切聖人不得解脫。何以故？一切眾生過去本業無始終故。是故我說，修聖道時，是道能遮無始終業。仁者，若受苦行便得道者，一切畜生悉應得道。是故先當調伏其心，不調伏身。以是因緣，我經中說，斫伐此林，莫斫伐樹。何以故？從林生怖，不從樹生。欲調伏身，先當調心，心喻於林，身喻於樹。』

須跋陀言：「世尊！我已先調伏心。」

佛言：「善男子，汝今云何能先調心？」

須跋陀言：「世尊！我先思惟，欲是無常、無樂、無淨，觀色即是常、樂、清淨。作是觀已，欲界結斷，獲得色處，是故名為先調伏心。次復觀色，色是無常，如癰、如瘡、如毒、如箭，見無色常，清淨寂靜，如是觀已，色界結盡，得無色處，是故名為先調伏心。次復觀想即是無常、癰瘡、毒箭，如是觀已，獲得非想非非想處。是非想非非想即一切智，寂靜清淨，無有墮墜，常恆不變，是故我能調伏其心。」

佛言：「善男子，汝云何能調伏心耶？汝今所得非想非非想定，猶名為想。涅槃無想，汝云何言獲得涅槃？善男子，汝已先能呵責麤想，今

者云何愛著細想，不知呵責？如是非想非非想處故名為想，如癰、如瘡、如毒、如箭。善男子，汝師鬱頭藍弗利根聰明，尚不能斷如是非想非非想處，受於惡身，況其餘者？」

「世尊！云何能斷一切諸有？」

佛言：「善男子，若觀實想¹⁹³，是人能斷一切諸有。」

須跋陀言：「世尊！云何名為實想¹⁹⁴？」

「善男子，無想¹⁹⁵之想¹⁹⁶名為實想¹⁹⁷。」

「世尊！云何名為無想¹⁹⁸之想¹⁹⁹？」

「善男子，一切法無自相、他相及自他相，無無因相，無作相，無受相，無作者相，無受者相，無法非法相，無男女相，無士夫相，無微塵相，無時節相，無為自相，無為他相，無為自他相，無有相，無無相，無生相，無生者相，無因相，無因因相，無果相，無果果相，無晝夜相，無明闇相，無見相，無見者相，無聞相，無聞者相，無覺知相，無覺知者相，無菩提相，無得菩

¹⁹³ 大正藏：相

¹⁹⁴ 大正藏：相

¹⁹⁵ 大正藏：相

¹⁹⁶ 大正藏：相

¹⁹⁷ 大正藏：相

¹⁹⁸ 大正藏：相

¹⁹⁹ 大正藏：相

提者相，無業相，無業主相，無煩惱相，無煩惱主相。善男子，如是等相，隨所滅處名真實想²⁰⁰。善男子，一切諸法皆是虛假，隨其滅處是名為實，是名實想²⁰¹，是名法界，名畢竟智，名第一義諦，名第一義空。善男子，是想²⁰²、法界、畢竟智、第一義諦、第一義空，下智觀故得聲聞菩提，中智觀故得緣覺菩提，上智觀故得無上菩提。」

說是法時，十千菩薩得一生實相；萬五千菩薩得二生法界；二萬五千菩薩得畢竟智；三萬五千菩薩悟第一義諦，是第一義諦亦名第一義空，亦名首楞嚴三昧；四萬五千菩薩得虛空三昧，是虛空三昧亦名廣大三昧，亦名智印三昧；五萬五千菩薩得不退忍，是不退忍亦名如法忍，亦名如法界；六萬五千菩薩得陀羅尼，是陀羅尼亦名大念心，亦名無閼智；七萬五千菩薩得師子吼三昧，是師子吼²⁰³亦名金剛三昧，亦名五智印三昧；八萬五千菩薩得平等三昧，是平等三昧亦名大慈大悲；無量恒河沙等眾生發阿耨多羅三藐三菩提心；無量恒河沙等眾生發緣覺心；無量恒河沙等眾生發聲聞心；人女、天女二萬億人，現轉女身，得

²⁰⁰ 大正藏：相

²⁰¹ 大正藏：相

²⁰² 大正藏：相

²⁰³ 大正藏：師子吼三昧；永樂北藏及龍藏：師子吼

男子身；須跋陀羅得阿羅漢果。

大般涅槃經卷第三十六終

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無大般涅槃經 (合掌三稱)

發願文

(一編)

志心懺悔。我(某甲)與一切衆生，從無始來，
迷失真心，流轉生死，六根罪障，無量無邊，圓
妙佛乘，無以開解，一切所願，不得現前。我今
讀誦大般涅槃經，以此善根，發露黑惡，過、現、
未來三業所造無邊重罪，皆得消滅，身心清淨，

惑障蠲除，福智莊嚴，淨因增長，自他行願速得圓成。願諸如來常在說法，所有功德起隨喜心，迴向菩提，證常樂果。命終之日，正念現前，面見彌陀及諸聖眾，一剎那頃，生蓮華中。普願眾生，俱成佛道。

迴向偈

(一編)

誦經功德殊勝行 無邊勝福皆迴向
普願沉溺諸有情 速往無量光佛刹
十方三世一切佛 一切菩薩摩訶薩
摩訶般若波羅蜜

迴向偈

(一編)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。



此咒置經書中可滅誤跨之罪

南无护法韦驮尊天菩萨

